

Siunnersuummut nassuiaatit**Nalinginnaasumik oqaaseqaatit****1. Aallarniut****1.1.**

Siunnersuut Naalakkersuisut suliffissaaleqinerup annikinnerulersinniarnani anguniagaannut ilaavoq, ataatsimoortumik imaluunniit ataasiusumik kalaallit suliffeqarnermi ingerlatsiviannik pilersitsinikkut, tassanilu ingerlatsineq piginnaaneqarfiusumik naammattumillu atortussaqaartumik aaqqissuussaatiillugu. Siunnersuut una isumannaarissaaq ”matumut ataatsimut politik-kimik”, suliffissanut, ilitersuisarnernut pikkorissaqquinnernillu ingerlatsisarnerni, taamalu suliffissaaleqisut aamma inuusuttut suli suliffeqarnermut pulasimangitsut pilersaarusiunneqarsinnaaqqullugit, qanoq aaqqissuussisoqarneratigut iluatitsiviusumik ingerlaqqissinnaanersut, piffissallu ingerlanerani suliffeqarnermut utseqqillutik, ikiorneqarlutillu nunatsinni suliffissanut nassaassaasunut.

Suliffeqarnermi inatsisit maanna atuuttuusut annertuutigit allaaserivaat kommunit aamma kommunalbestyrelsit assigiinngitsunik iliuuseqassasut, suliniutinillu assigiinngitsunik aallartitsisarlutik.

Kommunit sisamaasut ingerlatsinerminni assigiinngitsumik aaqqissuussisimapput, kommunit akornanniinnaangitsoq, aammali kommunip nammineq killeqarfiisa iluani. Tamatuma ajornakusoortippaa allaffissornikkut assigiissaakkamik ingerlatsinissaaq, sulisuusunik ilinniartitsineq nunamullu tamarmut ataatsimoortunik atuuttusamik suliniuteqarsinnaaneq. Tamatuma pisariaqartippaa sumiiffinnut ataasiakkaanut tunngatillugu annertuumik pissutsinut ilisimasaqarnissaaq, immikkuualuttunut aamma tunngatillugu, kommunini ataasiakkaani immikkoortunut ataasiakkaanut naapertuuttumik suliniuteqarsinnaajumalluni. Innuttaasullu sumiikkaluarunilluunniit assigiimmik sullinneqarnissamik qularnaariffigineqanngillat, taamaattoqarneratalu innuttaasut ilaat piginnaanilinnit eqaatsumillu sullinneqarnissamik periarfissaqartinngi-laar, taamalu nunap suatungaani najugaqarneq tunngavigiinnarlugu periarfissinneqassanatik.

Suliassat ullumikkut Piareersarfinnit Suliffissarsiuussisarfinnillu isumagineqartartut, sumiiffinni arlaqartuni imminnut aporaapput, tamatumalu kingunerisaanik marloqiusamik allaffissornikkut sullissisoqarluni. Tamannalu ilaatigut takuneqarsinnaavoq qarasaasianut programmini – database-ni – assigiinngitsuni marlunni Winformatik-imi aamma IT-REG-imi nalunaarsuisarnermi, taamaattumillu amerlasuutigut innuttaasumut ataatsimut iliuusissanut pilersaarutinik arlariinnik suliaqartoqartarpoq, ataqatigiissaagaanngitsunik. Iliuusissatullu pilersaa-

rutit isumaginnittoqarfimmit suliat ilanngukkaanni ilimanaannaavoq innuttaasoq ataaseq iliussissatut pilersaarutunik assigiinngitsunik pingasunik taakkunangaluunniit amerlanernik sanaanneqartartoq, ataqatigiissaagaanngitsunik, imaluunniit allaat imminnut assortuuttuusinnaasartunik. Tamanna aamma atuuppoq ilitersuisarnernut innuttaasullu pikkorissartinneqartarneranni, tassani innuttaasumik aalajangersimasumik siunnersuilluni ilitersuisarneq pikkorissaqititsisarnerlu suliffissarsiuussisarfirmi aalajangersimasumik sammiveqarsinnaasoq, Piareersarfimmilu inummik taassuminnga siunnersuineq allamut sammiveqarsinnaalluni, isumaginnittoqarfimmilu aamma sulii siunnersorneqarneq allaasinnaalluni.

Suliffeqarnermut Siunnersuisoqatigiit, kiisalu Suliniut nr. 2-mi suleqatigiissitaq, Naalakkersuisut pitsaanerusumik suliffissaqartitsinissamik anguniagaanni naliliipput kommunini ingerlatsiviit naammattumik isumannaartanngikkaat inuttaasut pisariaqartitsinertik naapertorlugu siunnersorneqarnissaat, pisariaqartumillu ikiorserneqartarnissaat, suliffeqarnermut qaninnerulersinniarlugit. Nalilersuineq taanna aamma ilalersorneqaqqippoq Inuussutissarsiornernut, Suliffeqarnermut Niuernermullu Naalakkersuisoqarfiup kommunini suliffeqarnikkut suliniutinik 2014-imi aamma 2015-imi misissuinerani. Tassani ersarissivoq suliffissarsiuussisarfiit, isumaginnittoqarfiit aamma Piareersarfiit sulisukippallaartut, sulisuusullu annertuu-tigut suliassanut tunngatillugu piginnaanernik aammalu inuttut piginnaanernik suliassanik naammassinnissinnaassagunik amigaateqartut. Illoqarfinni sulisunut nalunaarsuutit takutip-paat ataatsimut isigalugu sulisussanik suliassanut naleqquttunik amigaateqartoqartoq, sumiiffiillu ilaanni taamaallat innuttaasumut ataatsimut minutsit arfinillit immikkoortinneqarsinnaa-sartut, -sapaatip akunneranut, suliffeqarnermut tunngasutigut suliniutissanut, suliassanik ingerlatsinissamut piffissaq ilanngutereerlugu. Illoqarfinni tamangajanni suleriaatsit allaaserineqarnerat amigaataavoq, inatsisinullu atuuttunut ilisimasassat suliassaqarfimmut tunngasut naammattut pigineqaratik.

1.2. Ingerlatsiviit assigiissaakkamik ingerlatsiffiusut pitsaanerusumik assigiinnerusumillu innuttaasunut sullisseriaaseqartarput.

Nuna tamakkerlugu anginerusunik assigiissaagaanerusunillu ingerlatsivinnik pilersitsinikkut, kommunini suliffeqarnermi suliassanik ataatsimut ingerlatsineq eqqarsaatigalugu, ataatsimut misilittakkat tunuliaqutaralugit pilersitsisoqarsinnaavoq assigiissaakkanik naammassisaqarfiunerusunillu suleriaatsinik, immikkut fagitigut ilisimasallit ilisimasaasa tamanit pitsaanerusumik nukittunerusunillu iluaqutissarsivigineqarsinnaasumik. Tamanna suliffeqarnermut iluaqutaassaaq, - ataatsimut, aammalu innuttaasunut, innuttaasorlu qitiusutut inissinneqassalluni, pitsaanerpaamik siunnersorneqarsinnaanngorlugu, pikkorissarsinnaaqqullugu ikiorserneqarsinnaaqqullugulu suliffeqarnermigut inuiaqatigiinni iluaqutaasinnaanermi, taamalu annertunerpaamik nammineq inuunermini aqutsisuulersinnaaqqullugu.

Piareersarfiit aamma Suliffissarsiuussisarfiit ataatsimuulersinnerisigut, suliffissanut, ilitersuisarnernut pikkorissaqqinnernullu qitiusumik ingerlatsivittut, suliassat ataatsimut assigiinnerulissapput, naatsorsuutigineqarlunilu suliassat pitsaanerusumik sukkanerusumillu

naammassineqartalernissaat. Tamatumalu saniatigut marloqiusamik sullissineq annertuumik annikillineqassaaq.

Siunnersuut ilassuserneqassaaq suliffissarsiuussisarneq il.il. pillugit Inatsisartut inatsisaata nr. 5-ip 8. juni 2014-imeersup allanngortinneqarneranik, tasanilu suliffissaaleqisut pisussaaffilernerneqassapput CV-iiminnik suliffissanut nalunaarsuiffimmut 2015-ip ukiaani atortuulertussatut naatsorsuutigineqartumut allakkiaqartalernissaannik.

2. Siunnersuummi immikkoortut pingaernerit

2.1. Kommunini illoqarfinni tamani suliffissanut, ilitsersuisarnernut pikkorissaqqinnernullu qitiusumik ingerlatsivinnik pilersitsisoqassaaq. Suliffissanut, ilitsersuisarnernut pikkorissaqqinnernullu qitiusumik ingerlatsiviit maannamut Suliffissarsiuussisarfiit aamma Pia-reersarfiit suliaannik suliaqassapput. Inatsisit suliassanut assigiinngitsunut tunngasut suli inatsisinit allanit aalajangersagaapput. Siunnersuullu una taamaasilluni taamaallaat suliffissanut, ilitsersuisarnernut pikkorissaqqinnernullu suliassaqqarfimmut tunngavoq, aammalu Ilinniartitaanermut inuussutissarsiutinillu siunnersuisarneq pillugu Namminersorlutik Oqartussat inatsisaanni nr. 4, 29. november 2013-meersumi aalajagersakkanik ilaneqassalluni.

Kommunit qitiusumik ingerlatsivinnik pilersitsinerneq ilaliullugu isumannaassavaat kommunimi ingerlatsiviup immikkoortup suliassat taakkua kisiisa ingerlatarissagai.

Siunnersuummi siunertaavoq suliffeqarnerup tapersersorneqarnissaa, suliassaqqarfimmilu piginnaasat ataatsimut katersorneqarnissaat, inuusuttut suli suliffeqarnermut ikaarsaarsimanngitsut ikiorsersinnaajumallugit, aamma suliffissaaleqisut allat suliffeqarnermut pulatissinnaajumallugit imaluunniit utertissinnaajumallugit.

Tamatuma saniatigut innuttaasut suliffissarsiortuunngitsut pikkorissaqqittarnissaat neqeroortigineqassaaq. Siunertaavoq ilinniarsimassutsip kivinneqarnissaa aammalu innuttaasut atasiakkaat piginnaasaasa nukittorsarnissaat.

2.2. Fagitigut susassaqqartunik naleqquttunik suleqateqarneq

Isumannaarumallugu innuttaasut kommunini pitsaanerpaamik sullinneqartarnissaat, aalajangiisuvoq suliffissanut, ilitsersuisarnernut pikkorissaqqinnernullu qitiusumik ingerlatsiviit innuttaasut maannamut suliffeqarnermut attuumassuteqarnerannut paasissutissanik pisariaqqartunik tamanik paasissutissaateqartarnissaat, tamatumani aamma paasissutissanik, soq innuttaasup suliffeqarnerup avataaniinnera pillugu, kiisalu ilinniarsimassutsikkut pikkorissarsimikkullu ilisimasat piginnaasallu tamaasa eqqarsaatigalugit. Taamaasilluni innuttaasumut ataatsimut iliuusissatut pilersaarut ataaseq taamaallaat suliarineqartariaqarpoq. Inassutigineqassaaq iliuusissatut pilersaarut IT-REG-imi suliarineqartassasoq. Tamatuma pisariaqqartippaa

kommunimi qanittumik isumaginnittoqarfimmut ilinniartitaaneruilu susassaqtunut suleqateqarneq, tamatumani aamma isumaginninnermut allaffimmut meeqqallu atuarsiannut.

2.3. Naammassisassanut isumaqatigiissutit

Piareersarfiit 2006-imi aallartinneranniilli naammassisassanut isumaqatigiissutit Piareersarfinni tamani ingerlatsineq aqutaraat. Taamatut aqqissuussinermi misilittakkat annertunerusutigut pitsaasuupput, taamatut aqqissuussinikkut sulisussat pisariaqartinneqartut amerlassusissaat kiisalu ukiumi aningaasaliiffiusumi ataatsimut anguniagassat qularnaarneqartarmata.

Nutaanik suliffissanut, ilitersuisarnernut pikkorissaqqinnernullu qitiusumik ingerlatsivinnik pilersitsinikkut naammassisassanut tunngatillugu maanna kommuninut isumaqatigiissutaasartut ilassuserneqartussaassapput, suliffissarsiuussisarfiit ingerlanneqarnerannik suliassaannillu. Suliffissanut, ilitersuisarnernut pikkorissaqqinnernullu qitiusumik ingerlatsivinnut aningaasaliissutit naammassisassanut isumaqatigiissummi suliassanut nalunaaqutsersorneqassapput, periarfissaqarfiisigullu angusassatut siunnerfiusut aalajangersarneqartassallutik. Siunertaasoq tassa isumannaassallugu aningaasaliissutit kommuninut tunniunneqartut suliffissanut, ilitersuisarnernut pikkorissaqqinnernullu qitiusumik ingerlatsivinni suliassanut atorneqartassasut, taamalu suliassaqarfimmi tassani sulisuusut suliassaminnik ingerlatsillutillu immikkut ilisimasassanik katersisinnaasassasut. Siunnersuutigineqarpoq suliffissanut, ilitersuisarnernut pikkorissaqqinnernullu qitiusumik ingerlatsiviit kommunini suliassanut allanut allaffissornikkullu ingerlatsinnermut pitussimassanngitsut, taamalu uani aningaasaliissutit ingerlatanut allanut atorneqarsinnaassanngitsut.

3. Pisortanut aningaasaqarnikkut allaffissornikkullu kingunerisassai

Siunnersuut pisortanut aningaasaqarnikkut allaffissornikkullu assigiinngitsutigut kinguneqartussaavoq.

Aallaavittut siunnersuut aningaasartuuteqarnerulernermik kinguneqartussaannngilaq, suliassat pineqartut ullumikkut suliarineqartareermata, kommuninullu ataatsimoortumik tapiissutitsigut aningaasalersorneqarlutik maannakkullu aningaasanut inatsimmi aningaasat pigineqartunit soorlu Piareersarfiit.

Naatsorsuutigineqarpoq siunnersuummi suliassat pineqartut, piffissaq ikaarsaariarfiusoq naammassippat maannamiit akikinnerusumik sukkanerusumillu qitiusumik ingerlatsivinni ingerlanneqartalissasut, qitiusumik ingerlatsivinni sulisuusut immikkut ilisimasaqalersimasammata - specialiserersimassammata, - misilittakkaminnillu akunnerminni iluaquteqarsinnaalissallutik. Piffissami aallarnisaaffiusumi imaassinnaavoq qaffasinnerusumik Namminersorlutik Oqartussaniit aningaasaliisoqartarnissaa pisariaqarsinnaasoq, sulisuusut pisariaqartumik piginnaanngorsarneqarnerannut assigisaannullu.

4. Inuusutissarsiortunut aningaasarsiornikkut allaffissornikkullu kingunerisassai

Siunnersuut inuussutissarsiortunut aningaasarsiornikkut allaffissornikkullu kingunissanik imaqaangilaq.

5. Avatangiisinut, pinngortitamut inuiaallu peqqissusiannut kingunissai

Siunnersuut avatangiisinut, pinngortitamut inuiaallu peqqissusiannut kingunissanik imaqaangilaq.

6. Innuttaasunut kingunerisassai

Nalilerneqarpoq siunnersuut innuttaasunut aningaasaqarnikkut kinguneqartussaangitsutut. Allaffissornermut tunngatillugu innuttaasunut oqinnerulertussaassaaq, saaffiginniffissaq ataa-sinnaalissammat. Tamatumalu saniatigut anguniagaavoq innuttaasunik sullissinerup pitsaanerulernissaa piuminarnerulernissaalu.

Nunaqarfinni inoqarfinnilu najugaqartut sullinneqartassapput qitiusumik ingerlatsivinnit 17-iusunit, naammassisassanut isumaqatigiissut tunuliaqutaralugu. Qitiusumik ingerlatsiviit sorliit nunaqarfiit sorliit sullitarissaneraat naammassisassanut isumaqatigiissummi ersissaaq. Tamatumunnga atugassatut qitiusumik ingerlatsivinnut aningaasaliissutit ilaat Nunaqarfiit aamma inoqarfiit sullinneqartarnerannut immikkoortitaassapput.

7. Kingunerisassai allat pingaarutillit

Siunnersuut Naalagaaffeqatigiinnermut sunniuteqassanngilaq, namminersornermillu annertunerusumik pilersitsissanani.

8. Pisortanut kattuffinnullu tusarniaaneq

Siunnersuut piffissami 3. juni-miit 7. august-imut 2015 ukununnga tusarniaassutigineqarsimavoq:

Naalakkersuisut Siulittaasuata Naalakkersuisoqarfia, Aningaasaqarnermut Naalakkersuisoqarfik, Ilaqutariinnermut Naalakkersuisoqarfik, Naligiissitaanermut Isumaginninnermullu Naalakkersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, KANUKOKA, Qeqqata Kommunia, Kommune Kujalleq, Kommuneqafik Sermersooq, Qaasuitsup Kommunia, Kalaallit Nunaanni Sulisitsisut, NUSUKA, SIK, IMAK, Atorfillit Kattuffiat aamma ASG.

Tamatumalu saniatigut siunnersuut tamanut ammasumik Namminersorlutik Oqartussat quppersagaanni tusarniaassutigineqarsimavoq.

Ukunangalu tusarniaanermi akissutinik tigusaqartoqarpoq:

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Kalaallit Nunaanni Sulisitsisut, IMAK, Naalakkersuisut Siulittaasuata Naalakkersuisoqarfiani nunami namminermi pissutsinut immikkoortortaqarfik, Ilaqutariinnermut, Naligiissi-

taanermut Isumaginninnermullu Naalakkersuisoqarfik, Aningaasaqarnermut Naalakkersuisoqarfik, KANUKOKA, Qeqqata Kommunia, Kommune Kujalleq, Kommuneqarfik Sermer-sooq.

Uani tulliuuttuni tusarniaanermi akissutaasut sammineqassapput, aamma tusarniaanerup na-laani allannguutissatut siunnersuutit tiguneqartarsimasut. Oqaatigineqassaaq tusarniaanermi akissutaasuni – *uingasumik allatatut nalunaarneqartut* – taamaallaat pingaarnersiorlugit is-suarneqartarmata, ataatsimut naliliinermik tunngaveqartumik.

Tusarniaanermi akissutaasut tamarmiutillugit Inatsisartut ataatsimiititaliaannut suliamik inger-latsisussamut nassiunneqarput.

Tusarniaanermi akissutit arlaqartut siunnersuutip kommunit aqunneqarnerannut inatsimmut qanoq attuumassuteqarneranut tunngasuupput, kiisalu paasissutissanik paarlaasseqatigiittar-nermut aamma tunngasuullutik.

Kommunit aqunneqarnerannut tunngatillugu kalaallit inatsisiliornerat annertuutigut danskit kommuninik aqutsinermut inatsisaannik aallaaveqartumik suliaavoq, tassanilu ileqqut misilit-takkallu Danmark-imi kommunit aqunneqarnerannut aaqqissuussinernik tunngavilimmik su-liaalluni. Kalaallit kommuni aqutsinermut inatsisaannik qanoq paasinninnerup suliarisarnerani danskit paasinninnerannut ileqqinullu qanittumik inissittoqartassaaq, Kalaallit Nunaanni inatsimmik paasinninnermik aalajangersaasarnerni, taamaattoq kalaallini pissutsit tunngaviga-lugit allaassutaasut isiginiarlugit.

Tigussaasumik tusarniaanermi akissutigineqartuni apeqqutit tigussaasut kommuninik aqutsi-nermut tunngasut aammalu paasissutissanik paarlaasseqatigiittarnermut tunngasut eqqarsaati-galugit, innersuunneqarsinnaavoq 7. juli 2010 allakkiaq ”Suliffissarsiuussisarfiit aamma kommunimi ingerlatsiviit sinnerisa akornanni suliasat agguaanneqarnerat”, Kommunit Kat-tuffianniit suliaasoq.

Allakkiami pineqartumi nassuiaateqarfigineqarput danskit suliffissarsiuussisarfiisa kommuni-nilu ingerlatsiviit allat akornanni suliat qanoq agguataarneqarnersut, tamatumani aamma aningaasat ikiorsiissutit tunniunneqartarnerannut allaffiup aamma innuttaasunik kiffartuussi-vimmi suliasat qanoq inissisimansut.

Allakkiami ersarissumik nassuiaavigineqarput danskit inatsisaat aamma nalunaarutit arlaqar-tut naapertorlugit suliffissarsiuussisarfinni suliasat suliarineqartartut suuneri, takuuk ”Nalu-naarut; tassani erseqqissarneqarmat suliasat suut eqeersimaartumik suliffissarsiuussisarneq, isumaginninnermut politikki eqeersimaartoq aamma napparsimanersitit pillugit inatsit naa-pertorlugu suliasat suut suliffissarsiuussisarfinnit suliarineqartussaansut.”

Aamma takuuk una; ”Tungaviusumik oqaatigineqassaaq nalunaarut atuarneqartussaammat suliassatut suliffissarsiuussisarfinni (jobcenter) *suliarineqartussatut.*”

Allakkiamilu ersippoq;

”Kommunini suliffissaqartitsiniarnermi suliniutit suliffissarsiuussisarfinnit ingerlanneqartut” inatsit pineqartoq naapertorlugu imaqarpoq akisussaaffinnik aqutsinissamillu suliffissarsiuussisarnermi suleriaatsimik eqiingasumik, § 13, aamma nalunaarummi § 2:

- Inatsit pineqartoq naapertorlugu suliffissaqartitsiniarnermi eqeersimaartumik suliniutit tamarmik (inatsit naapertorlugu aningaasat tunniunneqartartut ilanngullugit).
- Isumaginninnermut politikkimi eqeersimaartumi suliffissaqartitsiniarnikkut suliniutit, napparsimanersiuutinut inatsit, naartunermi meerartaarnermilu sulinngiffeqartarnermut inatsit aamma qimaasut akuulersinniartarnerannut inatsit, tassunga ilanngullugit qimaasutut nuuttut akuulersinniartarnerannut atatillugu danskisut ilinniartitaaneq, qimaasunut inatsit naapertorlugu.
- Suliffeqarfinnut sammititaasumik isumaginninnikkut neqeroorutit ingerlanneqarnerat.
- Ilinniartitaanerit immikkut aqqissuussat.

Soorlu qulaani takuneqarsinnaasoq danskit nalunaarusiaanni suliassat ataasiakkaat qanoq aqunneqarnissaat aqqissuussaavoq, soorlu siunnersuummi uani aamma taamaaliortoqartoq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup nalunaarppaa iluaqutaasumik inatsisissatut siunnersuutip aamma Ilinniartitaanernut aamma inuussutissarsiuutinut siunnersuisarneq pillugu Inatsisartut inatsisaanni nr. 4, 29. november 2013-imi § 11-ip akornanni pissutsit nassuiaateqarfigineqarsinnaasut.

Nassuiaatini erseqqissaatigineqareerpoq ilinniartitaanernut inuussutissarsiuutinullu siunnersuisarneq pillugit Inatsisartut inatsisaat tamarmiusoq aamma suliffissanut, ilitersuisarnermut pikkorissaqqinnernullu qitiusumik ingerlatsivinni una siunnersuut naapertorlugu pilersinneqartussani aamma atuummat.

Ilinniartitaanermut inuussutissarsiuutinullu siunnersuisarneq pillugu Inatsisartut inatsisaat nr. 4, 29. november 2013-imeersoq naapertorlugu kommunalbestyrelsit pisussaaffigaat qitiusumik ilinniartitaanernut siunnersuisarfinnik pilersitsisarnissaq. Inatsimmut nassuiaatini ersippoq pisussaaffik taanna naammassineqarsinnaasoq Piareersarfiit pioreersut aqqutigalugit.

Siunnersuut una qitiusumik ingerlatsiviit kommunalbestyrelsit pilersitassaasa suliassaannut tunngavoq, suliffissarsiuussisarnermi pisussaaffiit naammassiniarlugit, tamatumunngalu atatillugu ilitersuisarneq pikkorissaqqinnerillu ilanngullugit ingerlatsinermi suliassanut tunngasut.

Tamaattumik kommunalbestyrelsimut periarfissaqarpoq naammassiumallugu pisussaaffik Inatsisartut inatsisaanni nr. 4, 29. november 2013-imeersoq, ilinniartitaanernut siunnersuisarnernullu inatsimmi § 11-imiittoq, suliffissanut, ilitersuisarnernut pikkorissaqqinnernullu qitiusumik ingerlatsivimmik pilersitsinikkut naammassissallugu.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfik aamma aperivoq Namminersornerullutik Oqartussat nalunaarutaat nr. 17 ulloq 16. oktober 2007 Piareersarfinni qitiusumik ingerlatsiviit suliaminnik ingerlatsinerat il.il. nalilii-sarneq pillugu aamma Suliffeqarnermut, suliffissarsiortut ilinniagaqalerniartullu sulilersineqartarnissaannut kiisalu Kalaallit Nunaannut suliaortartunut tunngasunik kommunalbestyrelsit paasissutissanik nalunaaruteqartarnissaat pillugu Namminersornerullutik Oqartussat nalunaarutaat nr. 20 19. novembri 2007-imeersoq atorunnaarsitsereerermi atuutiinassanersut.

Nalunaarutit atortuusut ingerlaqqikkallassapput.

Kalaallit Nunaanni Sulisitsisut (GE) siunnersuummut iluarisimaarinnipput. Tikkuarpaallu isumaliutigisariaqartoq inatsimmi periarfissaqartitsisoqassannginnersoq sumiiffinni ataatsimiititalianik pilersitsinissamut, inuussutissarsiortut sinniisuutitaqarfigisinnaasaannik.

Siunnersuut tusaatissatut tiguneqarpoq, siunnersuummilu aalajangersakkamik pilersitsisoqarluni, § 5, imm. 2, kommunalbestyrelsit periarfissaqalersillugit ataatsimiititalianik siunnersuisartunik pilersitsinissamut, inuussutissarsiortunit peqataaffigineqartumik.

Aamma GE-ip nalunaarppaa pisariaqartoq naammattunik atortussanik immikkoortitsisoqarnissaa. Nassuiaatini ersinngilaq naatsorsuutigineqartoq siunnersuut aningaasartuuteqarnerulernermik kinguneqassasoq, kisiannili naatsorsuutigineqarluni ilinniartut amerlanerulernissaat. Taamaattumik GE-p siunnersuutigaa aningaasaliissutit ilaat atorneqassasut ilinniartut Piareersarfinniit inuussutissarsiutinut ilinniarfinnut ilinniartunngortinneqartarnerannut.

AI2015-imi aamma AIS2016-imut aningaasaliissutinik immikkoortitsisoqarpoq taamaalilluni ukiut tulluuttut pingasut iluanni pilersaarusiorneqarluni ilinniartut amerlanerusut ilinniakkani atuagarsorfiunngitsuni aallartitalernissaat, taamaasilluni 2015-imi ilinniartut 100-nik amerlineqassallutik, 2016-imiillu ilassutit ukiut tamaasa ilinniartut 250-inik amerlanerusut tiguneqartalissallutik. Illassutit ilinniartussatut tiguneqartartussat naatsorsuutaavoq atuagarsorfiunngitsuni ilinniartuusarnissaat. Naalackersuisunut qitiulluinnarpoq siunnerfilersukkamik inuussuttunut inuunertik naallugu suliffeqartussanut suliniutinik pilersitsisoqarnissaa, naak taakkua nukittunerpaamik atuarfimmik ingerlatsisimangikkaluartut.

Piareersarfik aqqissuussaavoq inuussuttunik nukissaqannginnerusunik sullissinissamut, inuussuttunut toqqaannartumik ilinniarfinnut ingerlaqqittartunut, inuunerminnilu siunnerfeqa-reersunut sanilliullugu. Piareersarfiit taamaattumik aqqissuussaareerput inuussuttunut siun-

nerfilersuisutut, sakkussaannillu pilersitsisutut inuusuttut nammineq inuunerminnik ingerlatsisinnaanngornissaannut.

Naalackersuisullu aamma nalilersuineramik aallartitsisimapput, suliassat akisussaaffiillu Piareersarfiit aamma inuusuttunut ilinniarfiit akornanni agguataarneqarnerat pillugu, inuusuttut tigussaasunik aamma tigussaasuunngitsunik piginnaaneri eqqarsaatigalugit, ilinniagaqarnisamat piareersimalernissaat siunertaralugu. Suliamit nalunaarusiaq naatsorsuutigineqarpoq 2015-ip naalernerani saqqummissasoq. Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfik suliami allaffeqarfiuvoq.

Kiisalu GE-p nalunaarppaa kommuninut peqqissaartumik paaseqatigiissutigisariaqartoq ilutsinik assigiinngisitaartunik atuisoqartariaqannginnersoq, illoqarfiit qanoq angitiginerat tunngavigalugu.

Inatsisissatut siunnersuutip suliarineqarneranut atatillugu kommunit aamma Namminersorlutik Oqartussat akornanni ataatsimeeqatigiittoqartarsimavoq, soorluttaaq siunnersortinik suliffissarsiuussisarnermik pikkorissaqqinnernillu suliaqartunik tikeraartoqartarnikuusoq.

Suliamilu tassani annertuumi immikkuualuttortalersukkanik suleriaatsit allaaserineqarneranik Kalaallit Nunaanni illoqarfinni amerlanerni suliaqartoqarnikuulluni.

Taamaattumik inatsisissatut siunnersuut peqqissaartumik tunngavissiuunneqarsimavoq, aam-malu ataqatigiissaariffiusunik ataatsimiinnernik amerlasuunik kommunit kiisalu KANUKO-KA peqatigalugit ingerlatsisoqartarsimalluni, apeqqutit isumaqatigiinngissutaasinnaasut naapeqatigiiffiniarlugit.

Naammassisassanut isumaqatigiissummi anguniakkat soorunami pisariaqartitsinermik pissusiviusunillu ersersitsisassapput.

IMAK tusarniaanermut akisumminni allappoq allannguinerit kingullermik tusarniaasoqarneranut sanilliullugit siunnersuummik atoruminarnerulersitsisut.

Ilutigisaanik IMAK-ip ilanngullugu nassiuppaa kingullermik tusarniaasoqarmat, - augustimi 2014-imi – akissuteqaatertik:

IMAK-ip annertunerusutigut siunnersuut taperserpaa, kisiannili innersuullugu malugeqqullugu Sisimiuni Piareersarfiup namminersortunngorsarneqarsimanera.

Naalackersuisut suliaq ilisimavaat, kisiannili suliat ataasiakkat inatsisissatut siunnersuummut nasuiaatini oqaaseqarfigineqarsinnaanngillat.

IMAK-ip kaammattuutigaa qularnaarneqassasoq pisussaaffeqartoqarnersoq suliffissanut, ilitersuisarnernut pikkorissaqinnernullu qitiusumik ingerlatsiveqarnissaa, aammalu taman-na illoqarfinni suliamik namminersortunngorsaavusimasuni atuunnersoq.

Soorlu siunnersuummi ersittoq, kommunalbestyrelse pisussaaffeqarpoq suliffissanut, ilitersuisarnernut pikkorissaqinnernullu qitiusumik ingerlatsivinnik illoqarfinni tamani pilersitsinissamat. Taamaasilluni aamma tamanna atuutissaaq illoqarfinni sulianik namminersortunngorsaavusimasuni.

IMAK-ip nalunaarpaa inatsisip oqaasertaani ersarissarneqartariaqartoq Naalackersuisut akuerisinnaaneraat suliassaqaarfiup namminersortunut suliariumannittussarsiuunneqarsinnaanera.

Inatsisip §§-iini 4-mi aamma 5-imi aqunneqarput kommunalbestyrelsip suliffissanut, ilitersuisarnernut pikkorissaqinnernullu qitiusumik ingerlatsivinnik pilersitsinissaa ingerlatsinissaalu.

Periarfissaqaangilaq kommunit pisortatut suliassaasa suliariumannittussarsiuussinikkut allanut suliassangortinneqarnissaat. Ingerlatsinermi suliassat, assersuutigalugu eqqiaaneq aputaa jaasarnerlu kommuninut pisinnaatitsissut naapertorlugu suliariumannittussarsiuunneqarsinnaapput.

IMAK-p Naalackersuisunut kaammattuutigaa isumaliutigeqqullugu nakkutilliineq qanoq ittoq suliffeqarfinnut namminersortunut aqqqissuunneqarsinnaanersoq, aammalu Naalackersuisut qanoq pitsaassutsimik qulakkeerisarnissaat sulianut suliariumannittussarsiuunneqarsimasunut tunngatillugu.

Naalackersuisut kommunalbestyrelsinut naammassisassanut isumaqatigiissuteqarsimapput, suliassat pineqartut pillugit. Taamaattumik Naalackersuisunut periarfissaqarpoq nakkutillissalluni, kommunalbestyrelsit suliassat eqqortumik suliarisarneraat pillugu, naammassisassanut isumaqatigiissummi akiliutissanut pineqartunut sulianik naammassinittarneq apeqqutaamat. Inatsimmi uani § 7 aamma atuuppoq, ingerlatsinermik suliani kommunalbestyrelsit suliariumannittussarsiuullugu allanut suliassaangortissimasaanni.

Nakkutilliinermik § 7 naapertorlugu ingerlatsinerni paasineqarpat suliassaq kiffartuussinissamat isumaqatigiissut naapertorlugu suliarineqanngitsoq, § 9 naapertorlugu kommunimut akiliutaasussaniit uninngatitsisoqarsinnaavoq.

Naalackersuisut Siulittaasuata Naalackersuisoqarfiani Nunami namminermi pissutsinut im-mikkoortortaqaarfiup siunnersuut Inuussutissarsiornermut, Suliffeqarnermut Niuernermullu Naalackersuisoqarfimmik ataatsimeeqateqarnikkut misissorsimavaa, siunnersuummullu oqaaseqaatissaqarani.

Ilaqutariinnermut, Naligiissitaanermut Isumaginninnermullu Naalackersuisoqarfiup apeqqutigaa suli pisariaqassanersoq innuttaasumut ataatsimut iliuusissatut pilersaarusiortoqartarnissaa arlaqartunik, pisortanit ikiorsiissuteqartarnerni aammalu suliffissarsiortarnerni.

Aallaavioq tassavoq sapinngisamik innuttaasumut ataatsimut iliuusissatut pilersaarummik ataasiinnarmik suliaqartoqartarnissaa. Iliuusissatut pilersaarut aallaavittut paasissutissanik piviusunik taamaallaat imaqartassaaq, kommunip iluani immikkoortortanut assigiinngitsunut ingerlatsinneqarsinnaasumik. Iliuusissatut pilersaarusiaq paasissutissanik inuup kisimi pigisasaanik imaqarsimatillugu, immikkoortortap allap sulinerani sunniuteqartussaannngitsunik, taava immikkoortortap paasissutissanik immikkoortortamut allamut ingerlatitseqqittup paasissutissat taakkua peertariaqarpai paasissutissanik ingerlatitseqqinnginnermi. Kommunimi immikkoortortaq kissaateqarsimappat iliuusissatut pilersaarummik kommunimit allamit piniarniarluni, pisariaqarsinnaavoq inuup pineqartup akuersiseqqaarnissaa.

Ilaqutariinnermut, Naligiissitaanermut Isumaginninnermullu Naalackersuisoqarfiup nalunaarppaa assortuuttoqarpasimmat siunnersuummi aamma suliffissarsiuussisarneq pillugu Inatsisartut inatsisaanni, § 10, imm. 3-mi.

Assortuuttoqanngilaq, tamanna taamaallaat pissuteqarpoq inatsimmut teknikkimi assigiinngissummik.

Ilaqutariinnermut, Naligiissitaanermut Isumaginninnermullu Naalackersuisoqarfik aperivoq pisortanit ikiorsiissutit qanoq pineqassanersut innuttaasooq cv-minik suliffissanut quppersakkamut ilisisinnaanngippat, qitiusumillu ingerlatsiviup sulisukinneq pissutigulugu tamanna naammassisinnaanngippagu.

Innuttaasup inatsisit atuuttut piumasqaataat naammassisimappagit, taava taanna inatsisit naapertorlugit ikiorsiissutinik tigusassaminik tunineqassaaq.

Ilaqutariinnermut, Naligiissitaanermut Isumaginninnermullu Naalackersuisoqarfik aperivoq paasissutissanik paarlaasseqatigiissinnaaneq sultanik ingerlatsisarneq pillugu inatsimmi § 28 naapertorlugu qanoq periarfissaqarnersoq.

Pisortat ingerlatsineranni suliassat sularineqartarnerat pillugu Inatsisartut inatsisaat nr. 8, 13. juni 1994-imeersumi § 28, imm. 2-mi ilaatigut aalajangiunneqarpoq una:

”3) paasisimalikkap ingerlateqqinnissaa inatsisitigut imaluunniit inatsit malillugu aalajangersakkatigut ajornartitaanngippat,

4) ingerlatitseqqinneq pissappat inuinnartut imaluunniit pisortaqaarfittut soqutigisat, soqutigisanit isertuussinissamut pissutaasunit, tamakkununga ilanngullugit soqutigisat paasissutissiissutigineqartussamut tunngasut, annertunerujussuit sulissutiginnissaannut, imaluunniit,

5) ingerlatitseqqinneq suliassap suliarinerani pisariaqarpat imaluunniit pisariaqarpat oqartussaasut nakkutilliinermik imaluunniit misissuineramik suliassaminnik naammassinninnissaanut.”

Soorlu nalinginnaasumik nassuiaatini ersittoq ilaatigut sulianik ingerlatsinermut atatillugu pisariaqartarpoq paasissutissanik ingerlatitseqqittarneq, taamaattumillu ullumikkut periarfissaareerpoq pisariaqarlunilu paasissutissanik ingerlatitseqqittarneq. Nalornisoortoqarsinnaanera pinngitsoorniarlugu maanna ersarissumik aalajangersagaliortoqarpoq, paasissutissat ingerlatseqqinneqartarnerat pillugu. Tamatumali soorunami allanngortinngilaa, paasissutissat pineqartumut naleqquttut kisimik ingerlatseqqinneqarsinnaanerat.

Ilaqutariinnermut, Naligiissitaanermut Isumaginninnermullu Naalackersuisoqarfiup inassutigaa imm. 3-mik § 7-imi ikkussisoqassasoq (maanna § 9) tassanilu ersissasoq nalilinnik uninngatitsineq imm. 2 naapertorlugu innuttaasup ikiorsiissutinik tunineqarsinnaaneranut attuissanngitsoq.

Siunnersuut malinneqanngilaq. Innuttaasup inatsisit naapertorlugit ikiorsiissutinik pissarsinnaanera qitiusumik ingerlatsivinnut tapiissutinik annikillisisinermut attorneqarneqartannigimmat.

Ilaqutariinnermut, Naligiissitaanermut Isumaginninnermullu Naalackersuisoqarfik aperivoq innuttaasut kikkut suliffissarsiortuunngitsut pikkorissaqqinermik neqeroorfigineqarsinnaasuunersut.

Periarfissaqartitsisoqarpoq neqerooruteqarsinnaaneq innuttaasunut suliffissarsiortutut isigineqanngitsunut, kisiannili pikkorissaqqinnissamik pisariaqartitsisuusunut.

Tassaasinnaapput innuttaasut tullarsaqatigiit aappaanni aamma pingajuanni inissisimasut.

Ilaqutariinnermut, Naligiissitaanermut Isumaginninnermullu Naalackersuisoqarfik aperivoq IT-REG atorreqarsinnaanersoq isumaginnittoqarfinni IT-mi atortorissaarutit suleqatiginerisigut?

Inuussutissarsiornermut, Suliffeqarnermut Niuernermullu Naalackersuisoqarfiup it-reg ineriartortileruttorpaa, taanna paasissutissanik inunnut tunngasunik malussajasunik imaqarsinnaalersinniarlugu (paasissutissat assersuutigalugu isumaginninnermut siunnersortinit taamaallaat atorreqarsinnaasut) taamalu aamma isumaginnittoqarfinit atorreqarsinnaasut.

Ilaqutariinnermut, Naligiissitaanermut Isumaginninnermullu Naalackersuisoqarfik sulisorisat pikkorissaqqinneqartarnissaannut tunngatillugu arlalinnik apeqqutissaqarpoq.

Nassuiaatit kingornagut allanngortinneqarput. Taarsiullugulu § 4-mi aalajangersakkamik suliaqartoqarluni.

Ilaqutariinnermut, Naligiissitaanermut Isumaginninnermullu Naalackersuisoqarfik apeqquteqarpoq innuttaasut nunaqarfinni aamma illoqarfiit avataanni najugaqartut atugarisaannut kingunerisassai pillugit.

Inuit tamakku suliffissanut, ilitsersuisarnernut pikkorissaqqinnernullu qitiusumik ingerlatsivinnit illoqarfimmi qaninnermiittumit sullinneqartassapput. Taamaasilluni maanna aaqqis-suussinerusumiit pissutsit allannguuteqassanngillat, innuttaasut suliffissarsiuussisarfinnit Pia-reersarfinniillu illoqarfimmit qaninnermiittumit sullinneqartarmata.

Ilaqutariinnermut, Naligiissitaanermut Isumaginninnermullu Naalackersuisoqarfiup nalunaarpaa § 2, imm. 2-mut tunngatillugu nassuiaatinik amigaateqartutut ittoq.

Tamanna ilumoorpoq. Kingusinnerusukkut aalajangersakkamut allannguuteqartitsisoqarpoq, taamalu kukkuneq iluarsineqarluni.

Kommune Kujalleq (KK) tusarniaanermut akissummini arlalitsigut uparuaalluni nalunaarpoq Kommunip siunnersuut ajornartorsiutitaqartikkaa, oqaatigalugulu kommuninut namminernut ersarinnerusumik aaqqissuusaanissaq suliaritinneqaannarsinnaasoq.

KK-ip nalunaarpaa kommunit missingersuusiortarnermut pisinnaatitaaffiannik namminersorlutik oqartussanut nuussinerusoq, tamannalu kommuninik aqutsinermut inatsimmut akerliusoq.

Takuneqarsinnaanngilaq kommunit missingersuusiortarnermut pisussaaffiannik nuussisoqarnera, naammassisassanut kommunip Namminersorlutillu Oqartussat akornanni isumaqatigiisuteqartoqartarneratigut.

Tamatumani innersuunneqassaaq allakkiaq ”Suliffissarsiuussisarfiit aamma kommunimi ingerlatsiviit sinnerisa akornanni suliassat agguanneqarnerat”, Kommunit Kattuffianniit suliaasoq.

Allakkiami pineqartumi nassuiaateqarfigineqarput danskit suliffissarsiuussisarfiisa kommuninilu ingerlatsiviit allat akornanni suliat qanoq agguataarneqarnerisut, tamatumani aamma aningaasat ikiorsiissutit tunniunneqartarnerannut allaffiup aamma innuttaasunik kiffartuussivimmi suliassat inissisimasut.

Allakkiami ersarissumik nassuiaavigineqarput danskit inatsisaat aamma nalunaarutit arlaqartut naapertorlugit suliffissarsiuussisarfinni suliassat suliarineqartartut suuneri, takuuk ”Nalu-

naarut; tassani erseqqissarneqarmat suliassat suut eqeersimaartumik suliffissarsiuussisarneq, isumaginninnermut politikki eqeersimaartoq aamma napparsimangersiutit pillugit inatsit naapertorlugu suliassat suut suliffissarsiuussisarfinit suliarineqartussaasersut.”

Aamma takuuk una; ”Tunngaviusumik oqaatigineqassaaq nalunaarut atuarneqartussaammat suliassat suliffissarsiuussisarfinni (jobcenter) *suliarineqartussatut.*”

Allakkiamilu ersippoq;

”Kommunini suliffissaqartitsiniarnermi suliniutit suliffissarsiuussisarfimmit ingerlanneqartut” inatsit pineqartoq naapertorlugu imaqarpoq akisussaaffinnik aqutsinissamillu suliffissarsiuussisarnermi suleriaatsimik eqiingasumik, § 13, aamma nalunaarummi § 2:

- Inatsit pineqartoq naapertorlugu suliffissaqartitsiniarnermi eqeersimaartumik suliniutit tamarmik (inatsit naapertorlugu aningaasat tunniunneqartartut ilanngullugit).
- Isumaginninnermut politikki eqeersimaartumi suliffissaqartitsiniarnikkut suliniutit, napparsimangersiutinut inatsit, naartunermi meerartaarnermilu sulinnigiffeqartarnermut inatsit aamma qimaasut akuulersinniartarnerannut inatsit, tassunga ilanngullugit qimaasutut nuuttut akuulersinniartarnerannut atatillugu danskisut ilinniartitaaneq, qimaasunut inatsit naapertorlugu.
- Suliffeqarfinnut sammititaasumik isumaginninnikkut neqeroorutit ingerlanneqarnerat.
- Ilinniartitaanerit immikkut aqqissuussat.

Soorlu qulaani takuneqarsinnaasoq danskisut nalunaarusiaanni suliassat ataasiakkaat qanoq aqunneqarnissaat aqqissuussaavoq, soorlu siunnersuummi uani aamma taamaaliortoqartoq.

KK-p nalunaarpaa naligiissitsisoqartariaqartoq siunnersuutip § 1-iani suliffissanut, ilitsersuisarnermut pikkorissaqqinnernullu qitiusumik ingerlatsivinnik illoqarfinni tamani pilersitsinissat eqqarsaatigalugit, aamma ilinniartitaanernut inuussutissarsiuutinullu siunnersuisarnermut Inatsisartut inatsisaata nr. 4, 29. november 2013-imeersumi § 11-ip akor-nanni, kommunini qitiusumik siunnersuisarnermut ingerlatsivinnik ingerlatsineq eqqarsaatigalugu.

Nassuiaatini erseqqissarneqareerpoq Inatsisartut inatsisaat ilinniartitaanermut inuussutissarsiuutinullu siunnersuisarnermut tunngasoq tamarmi aamma suliffissanut, ilitsersuisarnermut pikkorissaqqinnernullu qitiusumik ingerlatsivinnut, siunnersuut una naapertorlugu pilersinneqartussanut aamma atuuttusoq.

Ilinniartitaanermut inuussutissarsiuutinillu siunnersuisarneq pillugu Namminersorlutik Oqartussat inatsisaanni nr. 4, 29. november 2013-meersumi § 11-imi ersippoq kommunalbestyrelsisip pisussaaffigigaa qitiusumik siunnersuisarfinnik pilersitsinissaq. Nassuiaatinilu ersippoq pisussaaffik taanna Piareersarfiit pioreersut aqutqigalugit naammassineqarsinnaasoq.

Siunnersuut una qitiusumik ingerlatsivinnut kommunalbestyrelsip pilersitassaanut tunngasuuvoq, suliffissarsiuussisarnermi, tamatumunngalu atatillugu ilitsersuisarnerni pikkorissaqqittarnernullu pisussaaffiit naammassineqarnissaannut.

Taamaasilluni kommunalbestyrelsinut ajornanngilaq Ilinniartitaanermut inuussutissarsiutinillu siunnersuisarneq pillugu Namminersorlutik Oqartussat inatsisaanni nr. 4, 29. november 2013-meersumi piussaaffiit naammassinissaat, § 11 naapertorlugu suliffissanut, ilitsersuisarnernut pikkorissaqqinnernullu qitiusumik ingerlatsivinnik pilersitsinikkut.

KK-p ilanngullugu nalunaarpaa inatsisit pineqartut imminnut naapertuuttunngorsarneqartariaqartut, Inatsisartut Ilinniartitaanermut inuussutissarsiutinillu siunnersuisarneq pillugu inatsisaanni nr. 4, 29. november 2013-meersumi § 25, naammassisassanut isumaqatigiissut eqqarsaatigalugu.

Inatsimmi erseqqissarneqarpoq inatsimmi tassani aamma naammassisassanut isumaqatigiissut tunngavigalugu aqqissuussisoqassasoq.

KK-p nalunaarpaa § 2-mi, immikkoortoq e meeqqat atuarfiannik suleqateqarneq pillugu anertunerusunik paasissutissanik imaqartariaqartoq.

Ilinniartitaanermut inuussutissarsiutinillu siunnersuisarneq pillugu inatsit tamarmi aamma suliffissanut, ilitsersuisarnernut pikkorissaqqinnernullu qitiusumik ingerlatsivinnut siunnersuut una naapertorlugu pilersinneqartussanut aamma atuuppoq.

KK-p nalunaarpaa ersarinnerusunik paasissutissaqanngitsoq ”piareersaataasumik pikkorisartitsinerit” (ilinniagaqalernissamut suliffeqalernissamulluunniit) qanoq paasineqassanersut pillugit.

Piareersaataasumik pikkorissarneq paasineqassaaq inuk imaluunniit inuit arlaqartut pikkorisarnissamut neqeroorfigineqartarnerattut. Qitiusumik ingerlatsiviit pikkorissartitsinernik ingerlatsisuusut ersarinnerusunik ilusilersussavaat taakkua qanoq aqqissuunneqarnissaat sunillu imaqarnissaat.

KK-p apeqqutigaa qanoq isumaqartinneqarnersooq pikkorissaqqittarnernut tunngatillugu nasuiaatini allanneqarmat ”tamatuma saniatigut” innuttaasut suliffissarsiortuunngitsut eqqarsaatigalugit.

Suliffissanut, ilitsersuisarnernut pikkorissaqqinnernullu qitiusumik ingerlatsiviit inatsisit naapertorlugu kommunini suliffissarsiuussisarnermi pikkorissaqqittarnermilu suliffissarsiortunik sullissineq isumagisaraat.

Innuttaasunik suliffissarsiortuunngitsunik pikkorissartitsisarneq suliffissaqartitsiniarluni suliniutini *suliassat* ilaginngilaat, taamaattumillu allanneqarpoq ”tamatuma saniatigut”.

Taakkua tassaasinnaapput inuit tulluarsaqatigiit aappaanni pingajuanniluunniit inissisimasut.

KK-p apequtigaa sooq nassuiaatini eqqaaneqannginnersut atuagarsornikkut pikkorissartitsisarnerit, assersuutigalugu AEU aamma FA.

§ 2, imm. 7-imi imaattumik allassimasoqarpoq: ”Suliffissaaleqisut pikkorissarneqarnerannut atatillugu inuussutissarsiutinut pikkorissartitsinernik innersuussisassallutik. Suliffissanut ilitsersuisarnernut pikkorissaqqinnernullu qitiusumik ingerlatsiviit ilinniagaqalernissamut imaluunniit suliffeqalernissamut piareersaataasunik pikkorissartitsinernik ingerlatsisinnaapput.” Ilinniagaqalernissamut piareersaataasumik pikkorissarneqarnerannut isumaqarpoq AEU-mi imaluunniit FA-mi ingerlatsineq.

KK-p nalunaarpaa piginnaanngorsaaqqiinnermut ikiorsiisarneq aamma suliffeerunnermut ikiorsiissutit periarfikippallaarlutillu illuinnaasiorpallaartut, suliassaq taanna Kommune Kujallermi isumaginnittoqarfimmit suliarineqartarmat.

Ullumikkutulli suliffissanut, ilitsersuisarnernut pikkorissaqqinnernullu qitiusumik ingerlatsiviit assersuutigalugu suliassarissavaat assersuutigalugu piginnaanngorsaaqqiinnermik ingerlatsisitsisarneq suliffissaqartitsiniarnermut suliniutit ilaattut.

Tassalu aaqqissuussineq taamaasilluni suliffissaqartitsiniarnermut tunngasumik aaqqissuussinerit ilagaat, isumaginninnermi aningaasaliissutaanngitsoq.

Soorlu ullumikkut taamaareersoq, ajornaqutissaqanngilaq aningaasanik tunniussisarnerup ingerlatsivimmi allamit suliarineqartarnissaa.

KK-p nalunaarpaa inatsisissatut siunnersuummi amigaataasoq inuusuttut suli ilinniakkamik inuussutissarsiummilluunniit aallartitsisimannngitsut sumiiffiñnut ornillugit ilitsersuisarnissap aaqqissuunneqarnera, tamanna Inatsisartut Ilinniartitaanermut inuussutissarsiutinillu siunnersuisarneq pillugu inatsisaanni nr. 4, 29. november 2013-imeersumi maleruagassiugaammat.

Tamanna Ilinniartitaanermut inuussutissarsiutinullu Inatsisartut inatsisaanni maleruagassiorneqareersimammat pissutissaqartinneqanngilaq uani siunnersummi maleruagassioqqinnissaa.

KK-p tikkuarpaa aamma ikaarsaariarnermut tunngasut maleruagassiorneqarsimannngitsut.

Tamanna Ilinniartitaanermut Inuussutissarsiutinullu Inatsisartut inatsisaanni maleruagassiorneqareersimammat pissutissaqartinneqanngilaq uani siunnersummi maleruagassioqqinnissaa.

KK-p tikkuarpaa periarfissaqartitsisoqartariaqartoq kommunit suliassanik allanik suliffissanut, ilitersuisarnernut pikkorissaqqinnernullu qitiusumik ingerlatsivinnut suliassiisarsinnaanerat.

Inatsisissatut siunnersuummi siunertaavoq allaffissorneq suliassallu ataatsimoortumi suliffissanut, ilitersuisarnernut pikkorissaqqinnernullu qitiusumik ingerlatsivinnut katersornissaat.

Innuttaasunik sullissineq pitsaanerpaq tunniussinnaajumallugu aamma qitiusumik ingerlatsivimmi sulisuusunut atugassat pitsaanerpaat atugassaritissinnaajumallugit naliiisoqarsimavoq suliffissanut, ilitersuisarnernut pikkorissaqqinnernullu qitiusumik ingerlatsiviit suliassanik allanik suliassersorneqassanngitsut, tamatumunnga ersarinnerusumik nalilersuinikkut pisariaqartumillu inatsisiliornikkut nukissanik pisariaqartunik ilassuteqarnermik kinguneqartumik aaqqissuussisoqanngippat.

KK-p apequtigaa naatsorsuutigineqassanersoq inuussutissarsiutinut tunngaviusumik ilin-niartitaanerni allannguuteqartitsisoqarumaartoq, tamanna nassuiaatini eqqaaneqarsimanngimmat.

Uani inatsisissatut siunnersuummi nalilerneqarpoq inuussutissarsiutinut tunngaviusumik ilin-niartitaanerni allannguutaasinnaasutut naatsorsuutigineqarsinnaasut aalajangiisuusumik suliffissanut, ilitersuisarnernut pikkorissaqqinnernullu qitiusumik ingerlatsivinnut isumalimmik sunniuteqassasut.

Akornutissaqanngilaq kommunit suliniutinik nutaanik aallartitsisarsinnaanerat. Nalilerneqarpallu suliassat pineqartut nutaat suliffissanut, ilitersuisarnernut pikkorissaqqinnernullu qitiusumik ingerlatsivinni suliarineqartassasut, periarfissaqarpoq tamatumunnga tunngasumik inatsisiliornissaq, tamannalu pillugu ersarinnerusunik naammassisassanut isumaqatigiissummi aalajangersaanissaq.

KK aperivoq inatsisissatut siunnersuutip aamma sulianik ingerlatsineq pillugu inatsimmi nal-inginnaasumik aalajangersakkat paasisutissanik paarlaasseqatigiittarneq pillugu qanoq imminnut "nipilersoqatigiinnersut" pillugu.

Pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8, 13. juni 1994-imeersumi § 28, imm. 2-mi aalajangiunneqarpoq una:

- ”3) paasisimalikkap ingerlatseqqinnissaa inatsisitigut imaluunniit inatsit malillugu aalajangersakkatigut ajornartitaanngippat,
- 4) ingerlatitseqqinneq pissappat inuinnartut imaluunniit pisortaqaarfittut soqutigisat, soqutiganit isertuussinissamut pissutaasunit, tamakkununnga ilanngullugit soqutigisat paasisutissiissutigineqartussamut tunngasut, annertunerujussuit sulissutigiginissaannut, imaluunniit

5) ingerlatitseqqinneq suliassap suliarinerani pisariaqarpat imaluunniit pisariaqarpat oqartussaasut nakkutilliinermik imaluunniit misissuineramik suliassaminnik naammassinninnissaanut.”

Soorluli nalinginnaasumik nassuiaatini allassimasoq, ilaatigut sulianik ingerlatsinermut pisariaqarpoq paasissutissanik ingerlatitseqqittarneq, taamaattumillu aamma ullumikkut periarfissaavoq pisariaqartarlunilu paasissutissanik ingerlatitseqqittarneq. Sutigulluunniit nalornisoqarsinnaanera pinngitsoorniarlugu matumuuna ersarissumik aalajangersagaliortoqarpoq paasissutissat ingerlatseqqinneqartassasut pillugit. Tamatumali soorunami allannngortinngilaa paasissutissat pineqartumut tunngasut suliamalla attuumassuteqartut kisimik ingerlatseqqinneqarsinnaanerat.

KK aperivoq suliffissanut, ilitersuisarnernut pikkorissaqqinnernullu qitiusumik ingerlatsiviit ingerlanneqarnerannut aningaasaliissutit immikkut aningaasaliissutininnaaneersuunersut, imaluunniit Namminersorlutik Oqartussat kommuninut ataatsimoortumik tapiissutaanut ilanngunneqartuunersut.

Qitiusumik ingerlatsiviit ingerlanneqarnerannut aningaasaliissutit § 9 naapertorlugu aqunneqarput. Immikkut ittumik aningaasaliissutaanngillat, kisiannili ataatsimoortunik kommuninut tapiissutini qitiusumik ingerlatsiviit ingerlanneqarnissaannut immikkoortitaallutik, ullumikkut kiffartuussinermut isumaqatigiissut naapertorlugu Piareersarfiit ingerlanneqarnerannut aningaasaliissutaasartut ilanngullugit.

KK-p tikkuarppaa aqutsinermut inatsimmut akerliussasoq qitiusumik ingerlatsivinni suliussunut tunngasumik isumaqatigiissuteqassalluni.

Tamatumani innersuunneqassaaq allakkiaq ”Suliffissarsiuussisarfiit aamma kommunimi ingerlatsiviit sinnerisa akornanni suliassat agguaanneqarnerat”, Kommunit Kattuffianniit suliassoq.

Allakkiami pineqartumi nassuiaateqarfigineqarput danskit suliffissarsiuussisarfiisa kommuninilu ingerlatsiviit allat akornanni suliassat qanoq agguataarneqarnerasut, tamatumani aamma aningaasat ikiorsiissutit tunniunneqartarnerannut allaffiup aamma innuttaasunik kiffartuussivimmi suliassat inissisimasut.

Allakkiami ersarissumik nassuiaavigineqarput danskit inatsisaat aamma nalunaarutit arlaqartut naapertorlugit suliffissarsiuussisarfinni suliassat suliarineqartartut suuneri, takuuk ”Nalunaarut; tassani erseqqissarneqarmat suliassat suut eqeersimaartumik suliffissarsiuussisarneq, isumaginninnermut politikki eqeersimaartoq aamma napparsimanersitit pillugit inatsit naapertorlugu suliassat suut suliffissarsiuussisarfinnit suliarineqartussaaneersut.”

Aamma takuuk una; ”Tungaviusumik oqaatigineqassaaq nalunaarut atuarneqartussaammat suliassatut suliffissarsiuussisarfinni (jobcenter) *suliarineqartussatut.*”

Allakkiamilu ersippoq;

”Kommunini suliffissaqartitsiniarnermi suliniutit suliffissarsiuussisarfimmit ingerlanneqartut” inatsit pineqartoq naapertorlugu imaqarpoq akisussaaffinnik aqutsinissamillu suliffissarsiuussisarnermi suleriaatsimik eqiingasumik, § 13, aamma nalunaarummi § 2:

- Inatsit pineqartoq naapertorlugu suliffissaqartitsiniarnermi eqeersimaartumik suliniutit tamarmik (inatsit naapertorlugu aningaasat tunniunneqartartut ilanngullugit).
- Isumaginninnermut politikkimi eqeersimaartumi suliffissaqartitsiniarnikkut suliniutit, napparsimanersiutinut inatsit, naartunermi meerartaarnermilu sulinngiffeqartarnermut inatsit aamma qimaasut akuulersinniartarnerannut inatsit, tassunga ilanngullugit qimaasutut nuuttut akuulersinniartarnerannut atatillugu danskisut ilinniartitaaneq, qimaasunut inatsit naapertorlugu.
- Suliffeqarfinnut sammititaasumik isumaginninnikkut neqeroorutit ingerlanneqarnerat.
- Ilinniartitaanerit immikkut aqqissuussat.

Soorlu qulaani takuneqarsinnaasoq danskisut nalunaarusiaanni suliassat ataasiakkaat qanoq aqunneqarnissaat aqqissuussaavoq, soorlu siunnersuummi uani aamma taamaaliortoqartoq.

KK-p nalunaarpaa aningaasaqarnikkut allaffissornikkullu kingunerisassai qularnaarneqassasut.

Oqaatigineqassaaq kommunalbestyrelsit 2016-ip ingerlanerani inatsit atortuulersissagaat, pi-sariaqartunillu suliniuteqassasut. Ilangullugu aamma oqaatigineqassaaq kommunalbestyrelsit Namminersorlutik Oqartussanut naammassisassanut isumaqatigiissuteqassasut 2016-ip naannginnerani.

Aningaasaqarnikkut allaffissornikkullu kingunerisassai allannguuteqangaatsiassasut naatsorsuutigineqanngilaq, ingerlatsineq maanna aningaasanut inatsimmi aningaasaliissutit kommunillu Piareersarfinnut aningaasartuutaasa iluanni ingerlanneqartussaammat, kiisalu kommuninut ataatsimoortumik tapiissutit iluanni suliffissarsiuussisarfiit ingerlanneqarnerannut aningaasaliissutaareersut iluanni.

Ilangullugu KK-ip apeqqutigaa atuagarsortuunngitsunut aningaasaliissutit agguataarneqarnerat.

Atuagarsortuunngitsunut ingerlatsinernut aningaasaliissutit ukiut tamaasa Aningaasanut inatsimmi aningaasaliissutinik tungaveqartarput. AI2015-imi aamma AIS2016-imi malunnaatilimmik annertussusilinnik ilassutitut immikkoortitsisoqarpoq. Taamaattoq angunia-gaavoq suliniutit ingerlanneqartut ataqatigiissumik ingerlanissaat. Kiisalu suliniutit aamma ingerlaa-

vartumik illoqarfinni ataasiakkaani kommuninilu pisariaqartitsinermut naleqqussartagassaap-
put.

*Naggasiullugu KK aperivoq Piareersarfinnut ingerlatsinermut tapiissutit eqqarsaatigalugit
allannguuteqassanersoq.*

Oqaatigineqassaaq kommunalbestyrelsit 2016-ip ingerlanerani inatsit atortuulersikkiartuaar-
tussaagaat, pisariaqartunillu iliuusissanik ingerlatsissallutik. Ilanngullugu oqaatigineqassaaq
kommunalbestyrelsit 2016-ip naannginnerani Namminersorlutik Oqartussanut naammassisas-
sanut isumaqatigiissuteqartussaasut.

Aningaasaqarnikkut allaffissornikkullu atugassarititaasut annertunerusumik allannguuteqas-
sasut naatsorsuutigineqanngilaq.

*Qeqqata Kommunia (QK) nalunaarpoq kommunimi ilinniartitaanermut tunngatillugu ataatsi-
mut siunertat anguniakkallu aammalu anguniakkat anguneqarsinnaaqullugit suliniuteqar-
fiusussat sammineqarnerusariaqartut.*

*QK-mi isumaqarput suliffissarsiuussisarnermi pikkorissaqqinnernilu suliniutit nukittorsarne-
qarsinnaasut suliassat naammassiniartarnerannut aningaasaliissutit amerlineqarnerisigut.*

*Naggasiullugulu QK-p nalunaarpaa isumaginnittoqarfinni sulisuusut IT-REG-imut attaveqar-
sinnaanissaat pingaaruteqartoq, aammalu meeqqat atuarfianniit IT-REG-imut paasissutissa-
nik nalunaarsuisoqarsinnaasariaqartoq.*

Inuussutissarsiornermut, Suliffeqarnermut Niuernermullu Naalakkersuisoqarfiup maanna IT-
REG ineriartortillugu ingerlappaa, paasissutissanik inunnut tunngasunik mianerisassanik
aamma imaqarsinnaanngortinniarlugu (paasissutissat assersuutigalugu isumaginninnermut
siunnersortinit taamaallaat takuneqarsinnaasussat), taamalu isumaginnittoqarfinnit atorneqar-
sinnaalersillugu.

*KANUKOKA tusarniaanermi akissuteqarpoq, tassanilu innersuullugit siusinnerusukkut 2014-
imi siunnersuut tusarniaassutigineqarmat tusarniaanermut akissutigisatik.*

*KANUKOKA isumaqarpoq siunnersuut kommunit nammineersinnaanerannut toqqaannartu-
mik killiliinerusoq, takuuk aqutsinermut inatsimmi tunngaviusut. Inassutigaallu peqqissaar-
tumik nalilersorneqassasoq inatsisissatut siunnersuut maanna suliassaqarfimmi aaqqissuus-
sinermut pitsanngoriaataassanersoq.*

Tamatumani innersuunneqassaaq allakkiaq ”Suliffissarsiuussisarfiit aamma kommunimi in-
gerlatsiviit sinnerisa akornanni suliassat agguanneqarnerat”, Kommunit Kattuffianniit suliaa-
soq.

Allakkiami pineqartumi nassuiaateqarfigineqarput danskit suliffissarsiuussisarfiisa kommuni-
nilu ingerlatsiviit allat akornanni suliart qanoq agguataarneqarnersut, tamatumani aamma
aningaasat ikiorsiissutit tunniunneqartarnerannut allaffiup aamma innuttaasunik kiffartuussi-
vimmi suliassat inissisimasut.

Allakkiami ersarissumik nassuiaavigineqarput danskit inatsisaat aamma nalunaarutit arlaqar-
tut naapertorlugit suliffissarsiuussisarfinni suliassat suliartineqartartut suuneri, takuuk ”Nalu-
naarut; tassani erseqqissarneqarmat suliassat suut eqeersimaartumik suliffissarsiuussisarneq,
isumaginninnermut politikki eqeersimaartoq aamma napparsimanersuutit pillugit inatsit naa-
pertorlugu suliassat suut suliffissarsiuussisarfinnit suliartineqartussaannersut.”

Aamma takuuk una; ”Tunngaviusumik oqaatigineqassaaq nalunaarut atuarneqartussaammat
suliassat suliffissarsiuussisarfinni (jobcenter) *suliartineqartussatut.*”

Allakkiamilu ersippoq;

”Kommunini suliffissaqartitsiniarnermi suliniutit suliffissarsiuussisarfinnit ingerlanneqartut”
inatsit pineqartoq naapertorlugu imaqarpoq akisussaaffinnik aqutsinissamillu suliffissarsiuus-
sisarnermi suleriaatsimik eqiingasumik, § 13, aamma nalunaarummi § 2:

- Inatsit pineqartoq naapertorlugu suliffissaqartitsiniarnermi eqeersimaartumik suliniu-
tit tamarmik (inatsit naapertorlugu aningaasat tunniunneqartartut ilanngullugit).
- Isumaginninnermut politikki eqeersimaartumi suliffissaqartitsiniarnermi suliniutit,
napparsimanersuutit inatsit, naartunermi meerartaarnermilu sulinnigiffeqartarnermut
inatsit aamma qimaasut akuulersinniartarnerannut inatsit, tassunga ilanngullugit qi-
maasutut nuuttut akuulersinniartarnerannut atatillugu danskisut ilinniartitaaneq, qi-
maasunut inatsit naapertorlugu.
- Suliffeqarfinnut sammititaasumik isumaginninnikkut neqeroorutit ingerlanneqarnerat.
- Ilinniartitaanerit immikkut aqqissuussat.

Soorlu qulaani takuneqarsinnaasoq danskit nalunaarusiaanni suliassat ataasiakkaat qanoq
aqunneqarnissaat aqqissuussaavoq, soorlu siunnersuummi uani aamma taamaaliortoqartoq.

*KANUKOKA-p siunnersuutigaa suleqatigiinnermik ingerlatsiviusussamik aqqissuussinermik
pilersitsisoqassasoq, suliffissanut, ilitsersuisarnernut pikkorissaqqinnernullu qitiusumik in-
gerlatsivimmiit, isumaginnittoqarfimmiit aamma meeqqat atuarfianniit sinniisoqartumik.*

Siunnersuut tusaatissatut tiguneqarpoq, inatsisillu oqaasertaa kiisalu inatsimmut nassuiaatit
iluarsineqarlutik.

*KANUKOKA-p aamma siunnersuutigaa inatsisissamut nassuiaatini ersissasoq paasissutissa-
nik paarlaasseqatigiittarneq aamma inunnut tunngasumik paasissutissanut malussajasunut*

atortinneqassasoq. Kiisalu paasissutissanik paarlaasseqatigiittarneq akuersissutitaqanngitsumik pisinnaanersoq.

Nassuiaatini erseqqissarneqarpoq paasissutissanik paarlaasseqatigiittarneq ingerlanneqartassasoq pisortat ingerlatsineranni suliassat suliarineqartarnerat pillugu inatsit naapertorlugu.

KANUKOKA-p nalunaarpaa kommunimik oqaloqatiginnittoqaqqaartariaqartoq aningaasaliissutinik ilanngaasoqannginnerani.

Pissusissamisussaaq tamanna sioqqullugu kommunimik oqaloqateqartoqarnissaa. Soorluli nassuiaatini erseqqissaatigineqartoq aalajangersagaq pineqartoq pineqaatissiinertut aalajangersagaanngilaq, kisiannili aalajangersagaalluni Namminersorlutik Oqartussat suliaasimanngitsunut akiliuteqannginnissaannut.

Naggasiullugu KANUKOKA-p nalunaarpaa pingaaruteqartuusoq kommunit qitiusumik ingerlatsivinnik pilersitsineranut aningaasartuutaasunut ingerlanneqarnerannullu tamakkiisumik matussutissarsineqarnissaat.

Aningaasaqarnermut Naalackersuisoqarfiup tikilluaqquaa kommunit suliassaqaarfimmi uani suliassaat ataatsimut katersorneqarmata aammalu suliassat akisussaaffiillu ataatsimoortinneqarmata.

Aningaasaqarnermut Naalackersuisoqarfiup nalilerpaa, pingaartuusoq siunnersuut naapertorlugu kommunit aaqqissuussisinnaalermata isumannaarniarlugu suliassat § 2 naapertorlugu suliassaasut naammassiniarsinnaajumallugit, kiisalu aamma sulisoqarnermikkut nunallu suatungaani inissisimaneq naapertorlugit kommunini ataasiakkaani mianerisassanik aamma isiginiagaqarsinnaalissallutik.

Aningaasaqarnermut Naalackersuisoqarfiup nalunaarpaa nassuiaatini imm. 2.3-mi erseqqisartariaqartoq nalilersuineq kimit suliarineqartussaannersoq.

Siunnersuut tamatuma kingorna naleqqussarneqarpoq, kisianni ilisimatitsissutigineqassaaq naammassisassanut isumaqatigiissummi naammassisassatut anguniakkat anguneqarsimanersut Naalackersuisunit nalilernerqartassammata.

Soorluli inatsimmi aalajangersakkami ersittoq Naalackersuisut taakkuupput annikilliliisinnasut, taamalu aamma Naalackersuisut taakkuusut nalilersuisussaataasut.

Aningaasaqarnermut Naalackersuisoqarfiup pingaartippaa kommuninut angusassatut siunerfiusunik ersarissunik isumaqatigiissuteqartoqartassasoq.

Aningaasaqarnermut Naalakkersuisoqarfiup nalunaarpaa ersarinngitsoq ilinniartut amerlanerusut tiguneqartalernissaat tamatumunngalu atasumik aningaasartuutit tooqqaannartumik AIS2016 aallaavigalugu pissanersut.

Tamanna naleqqussarneqarpoq.

Aningaasaqarnermut Naalakkersuisoqarfiup nalunaarpaa nassuiaatit imm. 4-mi siunnersuut aningaasaqarnikkut imaluunniit allaffissornikkut inuussutissarsiortunut kinguneqartussaanginnerarmassuk eqquvissumik ersersitsinerunngitsoq.

Inuussutissarsiortut kiffartuussinermik pitsaanerulertumik malugisaqassapput, sulisussanik innersuussisarneq aamma nunanit allanit sulisussanik atorfinititsisinnaanermut akuersissummik qinnuteqartarneq eqaannerusumik suliarineqartalissammata.

Oqaatigineqassaaq kommunalbestyrelsit 2016-ip ingerlanerani inatsit atortuulersittussammassuk, pisariaqartunillu iliuusissanik suliaqartussaallutik. Ilanngullugulu aamma oqaatigineqassaaq kommunalbestyrelsit naammassisassanut isumaqatigiissuteqartussaammata Namminersorlutik Oqartussanut 2016 naatinnagu. Naammassisassanut isumaqatigiissut maanna kiffartuussinermut isumaqatigiissutaasumut taartaassaaq.

Aningaasaqarnermut Naalakkersuisoqarfiup siunnersuutigaa nassuiaatini § 2-mi, imm. 1-imi nr. 3-mut aatsitassarsiorderup aamma utoqqarnik sullissinerup kingorna ”ilassusiisoqassasoq” aamma inuussutissarsiutit allat annertusiartortunik pisariaqartitsisussat, tamatumani aamma takornariartitsineq”.

Siunnersuut tusaatissatut tiguneqarpoq nassuiaatillu iluarsineqarlutik.

Aningaasaqarnermut Naalakkersuisoqarfiup naggasiullugu siunnersuutigaa qanoq annertutigusumik IT-REG kommunini Piareersarfinnilu atortuulersinneqareersimanersoq allaaserineqassasoq, kiisalu aamma atortorissaarut kommunini aaqqissuussinernut allanut atassuserneqarsinnaanersoq.

IT-REG ullumikkut Piareersarfinni tamani atorneqarpoq, Suliffissarsiuussisarfinnilu amerlanerpaani. IT-REG aamma inuussutissarsiutinut ilinniarfinni tamani PKU aamma AMA pikkorissarsimasunik nalunaarsuinerni atorneqarpoq. GUX-it tamarmik IT-REG atorpaat ilinniagaqartussanik nutaanik nalunaarsuinerni, GUX-imi ilinniagaqartoq taamaatikkaangat naammassigaangalluunniit.

Inuussutissarsiordermut, Suliffeqarnermut Niuernermullu Naalakkersuisoqarfik maanna IT-REG-imik ineriartortitsinermik ingerlatsivoq, taanna paasissutissanik aamma inunnut tunngasunik immikkut malussajasunik imaqarsinnaalersinniarlugu (paasissutissat assersuutigalugu

isumaginninnermut siunnersortinit atorneqarsinnaasunik) taamalu isumaginnittoqarfinit atorneqarsinnaasunik.

Kommuneqarfik Sermersooq (KS) tusarniaanermut akissumminni allappoq isumaqarlutik siunnersuut kommunit aqunneqarnerannut inatsimmi § 1-imut akerliusoq. KS isumaqarpoq siunnersuut nammineerluni aaqqissuussisinnaanermut akulerunnerusoq.

Tamatumani innersuunneqassaaq allakkiaq ”Suliffissarsiuussisarfiit aamma kommunimi ingerlatsiviit sinnerisa akornanni suliassat agguanneqarnerat”, Kommunit Kattuffianniit suliaasoq.

Allakkiami pineqartumi nassuiaateqarfigineqarput danskit suliffissarsiuussisarfiisa kommuninilu ingerlatsiviit allat akornanni suliat qanoq agguataarneqarnerisut, tamatumani aamma aningaasat ikiorsiissutit tunniunneqartarnerannut allaffiup aamma innuttaasunik kiffartuussivimmi suliassat inissisimasut.

Allakkiami ersarissumik nassuiaavigineqarput danskit inatsisaat aamma nalunaarutit arlaqartut naapertorlugit suliffissarsiuussisarfinni suliassat suliarineqartartut suuneri, takuuk ”Nalunaarut; tassani erseqqissarneqarmat suliassat suut eqeersimaartumik suliffissarsiuussisarneq, isumaginninnermut politikki eqeersimaartoq aamma napparsimanersiutit pillugit inatsit naapertorlugu suliassat suut suliffissarsiuussisarfinnit suliarineqartussaannersut.”

Aamma takuuk una; ”Tungaviusumik oqaatigineqassaaq nalunaarut atuarneqartussaammat suliassatut suliffissarsiuussisarfinni (jobcenter) *suliarineqartussatut.*”

Allakkiamilu ersippoq;

”Kommunini suliffissaqartitsiniarnermi suliniutit suliffissarsiuussisarfimmit ingerlanneqartut” inatsit pineqartoq naapertorlugu imaqarpoq akisussaaffinnik aqutsinissamillu suliffissarsiuussisarnermi suleriaatsimik eqiingasumik, § 13, aamma nalunaarummi § 2:

- Inatsit pineqartoq naapertorlugu suliffissaqartitsiniarnermi eqeersimaartumik suliniutit tamarmik (inatsit naapertorlugu aningaasat tunniunneqartartut ilanngullugit).
- Isumaginninnermut politikki eqeersimaartumi suliffissaqartitsiniarnikkut suliniutit, napparsimanersiutinut inatsit, naartunermi meerartaarnermilu sulinnigiffeqartarnermut inatsit aamma qiimaasut akuulersinniartarnerannut inatsit, tassunga ilanngullugit qiimaasutut nuuttut akuulersinniartarnerannut atatillugu danskisut ilinniartitaaneq, qiimaasunut inatsit naapertorlugu.
- Suliffeqarfinnut sammititaasumik isumaginninnikkut neqeroorutit ingerlanneqarnerat.
- Ilinniartitaanerit immikkut aaqqissuussat.

Soorlu qulaani takuneqarsinnaasoq danskit nalunaarusaanni suliassat ataasiakkaat qanoq aqunneqarnissaat aaqqissuussaavoq, soorlu siunnersuummi uani aamma taamaaliortoqartoq.

KS-ip nalunaarppaa naammassineqarsinnaanngitsoq piimasaqaat innuttaasup sumiiffimmut ataasiinnarmut saaffiginninnissaanut, avatangiisini pissutsit tunngavigalugit. KS-ip nalunaarppaa inissaqanngitsoq allaffissorpeq ataatsimoorfimmut ataatsimut katersussallugu.

Innuttaasup sumiiffimmut ataatsimut saaffiginninnissaanissaanik oqarnermi isumagineqarpoq inuttaasooq ingerlatsivimmuut ataatsimut saaffiginninnissaassasoq. Tassalu imaanngilaq tigussaasumik katersuuffimmut ataatsimut, kisiannili kissatigineqartoq innuttaasumut sullissinerup ataqatigissaarluarneqarnissaa.

Taamaasilluni innuttaasooq Suliffissanut, ilitsersuisarnernut pikkorissaqqinnernullu Qitiusumik ingerlatsivimmuut saaffiginninnermigut eqqortumik ilitsersorneqarsinnaassaaq.

KS-ip nalilerppaa pissusissamisuunngitsoq naammassisassanut isumaqatigiissummi aningaasaliissutit isumaqatigiissutigineqarsimasut annikillilerneqarsinnaanissaat. KS-ip inner-suuppaa assersuutigalugu sulisussat pisariaqartinneqartut amerlatigisut atorfinitsinnissaat ajornarmat.

Soorluli § 9, imm. 2-mut nassuiaatini nalunaarneqartoq aalajangersagaq pineqaatissiisarnernut aalajangersagaanngilaq.

Taamaattumillu periarfissaqarsimanngippat sulisussanik isumaqatigiissutaasut amerlatigisunik atorfinittisinissaq, taava pissusissamisoortumik atorfinittisinissamut aningaasaliissutinik ilanngaasoqassaaq. Periaaseq taanna atorneqassaaq kommune periarfissaqarsimanngimmat aningaasaliissutit atussallugit, taamaattumillu aningaasanik atorneqanngitsoortunik peqarluni, utertinneqartussanik.

KS-ip nalunaarppaa IT-REG inunnut tunngasunik paasissutissanik malussajasunik imaqartinneqarsinnaanngitsoq, soorlu peqqissutsimut paasissutissanik aamma inuup ajornartorsiutaa-nut tunngasunik, sulianik ingerlatsinermi ilisimassallugit pisariaqartuusunik. Tamannalu inunnut tunngasumik paasissutissanut inatsimmut attuumassuteqartoq, isortuussisussaane-mullu ataatsimut isigalugu.

Danskit inunnut tunngasumik paasissutissanut inatsisaanni (persondatalov) aamma Kalaallit Nunaanni inatsimmi atuuttuusumi pissutsinik akornutissaqartitsisoqanngilaq inunnut tunngasumik paasissutissat isortuussassat IT-REG-mut nalunaarsornissaannut. Pisariaqassappallu IT-REG-imi aaqqissuussinernik killilersuutinik pilersitsisoqassaaq.

KS-ip naggasiullugu nalunaarppaa kommunip naatsorsuutigigaa aningaasartuutaanerusussanut tamakkiisumik matussuserneqassasoq.

Siunnersuummi aalajangersakkanut ataasiakkaanut nassuiaatit

§ 1-imut

Aalajangersakkami aalajangiunneqarpoq suliffissanut, ilitsersuisarnernut pikkorissaqqinnernullu qitiusumik ingerlatsivimmik ataatsimik kommunimi illoqarfinni tamani pilersitsisoqasasooq. Illoqarfiit tamarmik tamatumunnga atatillugu paasineqassaaq illoqarfiit kommunitut 18-iusimasutut, kisianni Ivittuut ilanngunnagu.

Tamanna tigussaasumik isumaqarpoq Suliffissarsiuussisarfiit aamma Piereersarfiit ataatsimoortinneqassasut suliffissanut, ilitsersuisarnernut pikkorissaqqinnernullu qitiusumik ingerlatsivimmut ataatsimut kommunini tamani illoqarfinni tamani. Katinneqarnerisigut qulakkeerneqassaaq innuttaasut ataasiinnarmik saaffiginniffissaqarnissaat, innuttaasullu ilitsersorneqarnissamik pisariaqartitsisut, ilinniagassamut aamma suliffissamut tunngatillugu, ataatsimoortumik iliusissatut pilersaarusiunneqartalernissaat.

Nunaqarfiit inoqarfiillu allat kiffartuunneqassapput ornittarlugit ingerlatsinikkut, kiisalu Nunaqarfinni Siulersuisuniit innersuussisarnertigut. Qitiusumik ingerlatsiviup sorliup nunaqarfiit sorliit sullitarissanerai kommunalbestyrelsinut pineqartunut isumaqatigiissutigineqassaaq, taamaasillunilu qitiusumik ingerlatsiviit pineqartut kiffartuussinissaminnut pisariaqartunik atortussaminnik isumagineqassallutik.

Kommunalbestyrelsit akisussaaffigaat suliffissanut, ilitsersuisarnernut pikkorissaqqinnernullu qitiusumik ingerlatsivinnik pilersitsinissaq.

§ 2-mut

Imm. 1-imi nr. 1-imut)

Nuna tamakkerlugu suliffeqarnermi ingerlatsineq tapersorsinnaajumallugu suliffissanut, ilitsersuisarnernut pikkorissaqqinnernullu qitiusumik ingerlatsiviit suliffissanik innersuussisassapput, nunatta suatungaani luunniit suliffissaq pineqartoq inissisimagaluarpat. Suliffissarsior-toq akeqanngitsumik suliffissanut, ilitsersuisarnernut pikkorissaqqinnernullu qitiusumik ingerlatsivimmi siunnersorneqartassaaq, suliffissat suut nunami tamarmi inuttaqannginnersut suliffissarsior-tumullu suliffissat suut tulluartuunersut pillugit.

Qitiusumik ingerlatsiviit pissusissamisoortumik kommunimi pineqartumi innuttaasunik siunnersuisassapput ilitsersuillutillu, kisianni aalajangersakkat naapertorlugit innuttaasut siunnersorneqartassapput nuna tamakkerlugu periarfissanut, tamatumani aamma nikilertorsinnaanermut aningaasaliissutinik qinnuteqarsinnaanermut.

Imm. 1-imi nr. 2-mut)

Suliffissanik innersuussinerit ilaatigut pisassapput Suliffissarsiuussisarneq il.il. pillugit Inatsisartut inatsisaat naapertorlugu, inatsisillu allat suulluunniit piffissami pineqartumi tamatumunnga atuuttut naapertorlugit. Naatsorsuutigineqarpoq nuna tamakkerlugu suliffissanut nittartagaq 2015-imi saqqummiunneqaruni suliffissanik innersuussisarnermi sakkuulissasoq pingaaruteqartoq, Kalaallit Nunaanni atorfinnut sunulluunniit tunngatillugu. Pingaaruteqarpoq suliffissanut, ilitsersuisarnernut pikkorissaqqinnernullu qitiusumik ingerlatsiviit inuussutissarsiutilinnut oqaloqatiginnittuaannassasut qanimullu suleqatiginnillutik, sapinngisamik anner-tunerpaamik suliffissanut piusunut tunngatillugu innersuussisarneq sulisussanut piukkunnartunut pitsaanerpaamik ingerlanneqarsinnaaqullugu. Kalaallit Nunaanni suliffeqarnermik ingerlatsivimmuut ataasiusumut suliat ingerlanneqarmata, qitiusumik ingerlatsiviit inuussutissarsiortunut Kalaallit Nunaanni tamarmiusumi ingerlatsisunut oqaloqatiginnittussaapput, malinnaaffigissallugillu inuussutissarsiornikkut suliniutit nunami tamarmi ingerlanneqartut.

Imm. 1-imi nr. 3-mut)

Suliffissanut, ilitsersuisarnernut pikkorissaqqinnernullu qitiusumik ingerlatsiviit suliffissanik innersuussisassapput suliffissarsiortunut tamanut, inuussutissarsiutini tamani, killilersugaangitsumik. Siunissamut sammisumik naatsorsuutigineqarpoq annertusiartortumik suliffissanut aatsitassarsiornermi aamma inunnik isumaginninnermi innersuussisoqartarnissaa. Tamatumalu saniatigut aamma suliffissanut inuussutissarsiutini annertusiartortumik sulisussarsiuler-tus-saasuni, tamatumani aamma takornariartitsinermi.

Imm. 1-imi nr. 4-mut)

Aalajangersagaq ilassutaavoq Inatsisartut inatsisaannut nr. 4, 29. november 2013-imeersumut, tassani ilinniartitaanernut inuussutissarsiutinullu siunnersuisarneq inuussutissarsiutinut ilinniartinnut suliassaatinneqarmat.

Imm. 1-imi nr. 5-imut)

Suliffissanut, ilitsersuisarnernut pikkorissaqqinnernullu qitiusumik ingerlatsivinniit ilinniartitaanernut aamma inuussutissarsiutinut siunnersorneqartarnernut Inatsisartut inatsisaat naapertorlugit ornigulluni meeqqat atuarfianni klassini qaffasinnerni siunnersuisarneq ingerlanneqartassaaq. Taamatut aaqqissuussisoqarpoq isumannaarumallugu ilinniartut ataasiakkaat tamar-mik pilersaaruteqartarnissaat meeqqat atuarfiata kingorna ilinniagaqarnissamut imaluunniit suliffeqalernissamut. Kiisalu aamma aalajangiisuuvoq meeqqat atuarfiata ukioqatigiiaartumik Suliffissanut, Ilitsersuisarnernut Pikkorissaqqinnernullu Qitiusumik Ingerlatsivinnut ukiut tamaasa allassimaffinnik nassiussaartarnissaa, taamaaliornikkut qitiusumik ingerlatsiviit meeqqat atuarfiata kingorna atuartut ataasiakkaalugit attavigisinnaaniassammatigut.

Imm. 1-imi nr. 6-imut)

Iliuusissatut pilersaarutininik suliaqarneq ingerlanneqartassaaq sukkulluunniit inatsisit atuuttut naapertorlugit.

Innuttaasut suliffissarsiortut suliffeqarnermut isertersinnaanerannut imaluunniit uteqqissinnaanerannut pingaaruteqartumik tunngaviuvoq iliuusissamik pilersaarutip pikkorissaqqinnissamat iliuusissanik pisariaqartunik ilaqarnissaa, isumannaarumallugu suliffissarsiortup suliffeqalernissaa.

Aalajangiisuuvorlu iliuusissatut pilersaarusiatic suliarineqartarnissaat kommunimi ingerlatsiviit allat qanilluinnartumik suleqatigalugit, tamatumani aamma inunnt isumaginninnermut allaffik aamma meeqqat atuarfiat, taamaaliornikkut tamakkiisumik qaammarsaavigineqartumik innuttaasumut suliffissarsiortumut iliuusissatut pilersaarusiortoqarsinnaaqullugu - ataatsimik. Suleqatigiinneq taanna, aamma paasissutissanik paarlaasseqatigiittarneq ingerlanneqartassapput nalunaarsuisarnermut inatsit aamma sulianik ingerlatsisarnermut inatsit naapertorlugit.

Imm. 1-imi nr. 7-imut)

Pikkorissarnissanut innersuussisarnerit ilaatigut pisassapput suliffeerunnermi ikiorsiissutit pillugit Inatsisartut peqqussutaat naapertorlugi, piginnaanngorsaaqqinnissamat Inatsisartut inatsisaat aamma suliffissaaleqisunik sulilersitsiniarneq pillugu peqqussut naapertorlugit. Pikkorissaanernut innuttaasup ilinniagaqarsinnaanermt piginnaanngorsarfigisinnaasaanut aamma immikkut fagitigut pikkorissarnernut suliffeqarnermi ingerlatsivinnut sammiveqartunut innersuussisoqartassaaq.

Imm. 1-imi nr. 8-mut)

Aalajangersakkap aalajangiuppaa qitiusumik ingerlatsiviit suliffissaaleqisunik tulluarsaqatigiiaanut immikkoortitserisassasut. Tulluarsaqatigiiaanut immikkoortitserineq paasineqassaaq suliffissaaleqisunik nalilersuinermtik tunngaveqartumik assigiiaanut inissititserisarnertut.

Innuttaasunut tamanut sapinngisamik pitsaanerpaamik suliffeqarnermt sammivilimmik sulisuteqartoqartarsinnaaqullugu tulluarsaqatigiiaanut eqqortumik immikkoortitserisoqartassaaq. Isumaginninnermt allaffimmik qanimut suleqateqarnermtik pilersitsisoqartariaqarpoq, innuttaasut suliffissaaleqisut tulluarsaqatigiiaanut inissititserneqartarnerannut atatillugu.

Imm. 1-imi nr. 9-mut)

Aalajangersakkami aalajangiunneqarpoq suliffissanut, ilitersuisarnermt pikkorissaqqinnernullu qitiusumik ingerlatsiviit suliassarigaat suliffissaaleqisunik nalunaarsuineq, ilaatigut suliffissanut quppersagaq iluaqutigalugu, taannalu 2015-imi saqqummiunneqassasoq naatsorsuutigineqarpoq. Soorluttaa qitiusumik ingerlatsiviit inatsisit allat aamma tunngavigalugit nalunaarsuisartussaasut.

§ 3-mut

Imm. 1-imut

Aalajangersakkami aalajangiunneqarpoq qitiusumik ingerlatsiviit aqutarigaat suliffissaarun-
nermi ikiorsiissutit aamma piginnaangorsaaqqinnissamut ikiorsiissutit, tamatumunnga
inatsisit atuuttut naapertorlugit.

Imm. 2-mut

Piginnaangorsaaqqinnermut pilersaarutit sukkulluunniit taakkununnga inatsisit atuuttut
naapertorlugit pisassapput.

Imm. 3-mut

Suliffissanut, ilitersuisarnernut pikkorissaqqinnernullu qitiusumik ingerlatsiviit nikilertorsin-
naanermut tapiissutinik qinnuteqartunut tunngatillugu suliassanik ingerlatsisarnerat sukkul-
luunniit tamatumunnga inatsit atuuttoq naapertorlugit pisassaaq.

Imm. 4-mut

Suliffissanut, ilitersuisarnernut pikkorissaqqinnernullu qitiusumik ingerlatsiviit sulisussanik
nunatta avataaniit atorfinititsinissanut qinnuteqaatinik suliqaartarnerat sukkulluunniit inatsisit
tamatumunnga atuuttut naapertorlugit suliarineqartassapput.

§ 4-mut

Aalajangersakkap assigaa ilinniartitaanernut inuussutissarsiutinullu siunnersuineq pillugu
Inatsisartut inatsisaanni § 12.

Imm. 1-imut

Aalajangersakkami aalajangiunneqarpoq kommunalbestyrelse pisortatut atorfinititsisartuusut
sinniisorigaat, siunnersuisartunut, sulianik ingerlatsisunullu, suliffissanut, ilitersuisarnernut
pikkorissaqqinnernullu qitiusumik ingerlatsivinnut atatillugu, taamaattumillu kommunalbesty-
relse aamma akisussaasuusoq sulisuusut inatsimmi piumasaqaatinik naammassinninnissaan-
nut tunngatillugu.

Kiisalu aalajangersakkap naggataani piumasaqaateqarpoq qitiusumik siunnersuisarfiit illutaa-
sa qanoq ittuunissaannut. Kommunalbestyrelse pisussaaffilerneqarpoq isumannaassagaa su-
liffissanut, ilitersuisarnernut pikkorissaqqinnernullu qitiusumik ingerlatsiviit suliassaat piler-
saarusiorneqarsinnaassasut, allaffinniillu naammaginartunit aallaaveqassasut. Tamanna
peqquteqarpoq ilitersuisarneq suliniutinillu ingerlatsineq akornusersorneqanngitsumik inger-
lanneqarsinnaassammat. Aalajangersagarli imatut isumaqanngilaq, kommunip ilitersuis-
arnera taamaallaat kommunip iniutaani ingerlanneqarsinnaassasoq, soorluli tamanna
soorunami pisinnaanngitsoq inuit ornillugit ilitersuisarnerni.

Imm. 2-mut

Aalajangersakkap oqaaseqatigiivini siullerni piginnaasanut pingaarnertut piumasaqaatit er-
sippoq siunnersuisartoq Naalakkersuisunit akuerisaasumik siunnersuisarnernut ilinniartitaan-
ermik naammassinnissimassasoq, inatsit naapertorlugu ilitersuineramik ingerlatsisinnaajumal-

luni. Aalajangersagaq immikkoortunik marlunnik pingaarnertut aalajangikkamik saneqqutsinissamut periarfissamik imaqarpoq. Saneqqutsinissaaneq aalajangersakkamit pingaarnermut siulleq tassaavoq ilinniakkamik pineqartumik naammassinnissimangikkaluarluni ilitsersuisarnermik suliaqartoqarsinnaasoq, allamik suliffissanut, ilitsersuisarnermullu qitiusumik ingerlatsivimmi suliaasanut naleqquttumik ilinniagaqarsimagaanni. Ilinniakkatut naleqquttut Naalackersuisunit akuerineqarsinnaasut assersuutitut taaneqarsinnaavoq nunani allani ilinniagaasumik siunnersuinermit ilinniagaq. Tamatumani aamma Ilisimatusarfimmi – Universitet-imi – ilinniakkat, imaluunniit isumaginninnermi siunnersortitut ilinniagaq pissutsit atuuttut naapertorlugit akuerineqarsinnaapput. Naalackersuisut akuersinerat ilinniakkat pineqartut tunngavigalugit naliliinernik aallaaveqassaaq.

Aalajangersakkamik saneqqutsinissamut periarfissat aappaat uani aalajangersakkami oqaaseqatigiit aappaanniippoq, taannalu utaqqiisaasumik saneqqutsinissamut aalajangersagaavoq. Saneqqutsinissamut aalajangersakkap atorineqarsinnaaneranut piumasaqaataavoq inuk pineqartoq ilitsersuinissamut assigiinngitsutigut piginnaaneqartuussasoq, ilutigisaanillu ilitsersuisartut ilinniakkamik ingerlatsisuussasoq, imaluunniit tamatumunnga assingusumik ilinniakkamik aallartitsingajalersuuneq. Tassalu aalajangersagaq taanna ataavartumik saneqqutsinissamut aalajangersagaangilaq, tassami aalajangersakkami tunngaviummat pineqartumik ilinniagaqarnissamut piumasaqaataasup piffissap ingerlaneqarani naammassineqarnissaa.

Naalackersuisut inuussutissarsiutinut ilinniarfiit suleqatigalugit ilinniakkat taakkua, imaluunniit pikkorissaqqinnerit taakkua neqeroorutigissavaat.

§ 5-imut

Imm. 1-imut

Suliffissanut, ilitsersuisarnernut pikkorissaqqinnernullu qitiusumik ingerlatsiviit ingerlaneqarnerat aningaasaqarnikkut kommunimi allaffissornikkut ingerlatsinermut sulianullu allanut attuumassuteqanngitsumik ingerlanneqartassaaq. Taamatut aaqquussisoqassaaq isumannaarumallugu suliffissanut, ilitsersuisarnernut pikkorissaqqinnernullu sulianik qitiusumik ingerlatsivimmi piginnaasanik ineriartortitsisoqarsinnaanera, aamma isumannaarumallugu suliffissaaleqinerup annikillisinniarnernut aningaasaliissutaasut siunertaasut naapertorlugit atorineqarnissaat, kiisalu isumannaarumallugu eqaannerusumik assigiinnerusumillu suliffissarsiortunut tunngasumik suliati suliarineqartarnissaat. Suliffissanut, ilitsersuisarnernut pikkorissaqqinnernullu qitiusumik ingerlatsiviit taamaattumik kommunimi suliassanik allanik suliassinneqartassanngillat, aningaasaliissutaasullu ingerlatanut allanut atorineqassanatik, naammassisassanut isumaqatigiissutaasumi aalajangersarneqarsimasut aningaasaliissutillugu saneqqullugit.

Imm. 2-mut

Suliffissanut, ilitersuisarnernut pikkorissaqqinnernullu qitiusumik ingerlatsiviit aamma inuussutissarsiortut akornanni pitsaasumik suleqatigiittoqarnissaa isumannaarumallugu pisinnaatitsisoqassaaq ataatsimiititaliamik siunnersuisuusussamik pilersitsinissamut. Ataatsimiititaliani taakkunani illuatungeriit oqaluuserisinnaassavaat iliuousissat isumassarsiallu, inuussutissarsiortullu isummanik saqqummiussuisarsinnaassapput suliaassat qanoq ingerlanneqartarsinnaanerannut, qanorlu aaqqissuussinikkut innuttaasut pitsaanerpaamik ilitersorneqartasansersut sumiiffimmi pineqartumi suliffeqalivinnissamut.

Imm. 3-mut

Ataqatigiissaarineq pitsaasoq isumannaarumallugu suliniutinillu ingerlatsineq pitsaasumik ataqatigiissikkusullugu, kommunini suleqatigiinnermut aaqqissuussinermik pilersitsisoqassaaq. Suleqatigiinnermut aaqqissuussineq ilaatigut isumannaariffiussaaq suleqatigiinnikkut iliuousissatut pilersaarutininik suliaqartarnermut, kiisalu aamma paasissutissanik naleqquttunik ingerlatsiviit susassaqtut akornanni paarlaasseqatigiittoqartarnissaanut.

Tamatumalu saniatigut ataqatigiissaakkamik tulluarsaqatigiiaanut immikkoortitserisarnermi suliniutit ingerlanneqassapput, innuttaasumut namminermut iluaqusiisumik.

Suliffissanut, ilitersuisarnernut pikkorissaqqinnernullu qitiusumik ingerlatsiviit suleqatigiiffimmut allattoqarfiussapput, tassanilu aamma nakkutigineqassaaq ataqatigiissaaraluni ataatsimiittarnernik ingerlatsisoqartarnissaa, pisariaqartitsineq naapertorlugu ingerlanneqartartunik, taamaattoq minnerpaamik qaammammut ataasiarluni.

§ 6-imut

Aalajangersagaq ikkunneqarpoq isumannaarumallugu paasissutissanik ingerlatitseqqittarneq suliffissanit, ilitersuisarnernut pikkorissaqqinnernullu qitiusumik ingerlatsivinniit ingerlatsivinnut isumaginninnermut tunngasunik suliaqartunut.

Iliuousissatut pilersaarutininik suliaqarnerni, sapinngisamillu suliffissarsiortut pitsaanerpaamik ikiorsersinnaajumallugit, suliffeqarnermut uteqqissinnaaqullugit, pisariaqarsinnaasarpoq inunnut namminernut tunngasumik paasissutissat isumaginninnermut tunngasut pissarsiarineqarsinnaanissaat. Aalajangersakkap pineqartup isumannaassavaa tigussaasumik naliliisoqarneratigut ingerlatsiviit akornanni paarlaasseqatigiittoqartarsinnaanera, nalilerneqarpat suliffissarsiuussinerup, ilitersuinerup pikkorissaqqinnernullu innersuussinerup isumagineqarneranni tamanna pisariaqartuusoq.

Paasissutissanik paarlaasseqatigiittarneq pisassaaq inatsisit atuuttut naapertorlugit, tamamani aamma pisortat ingerlatsiviini ingerlatsinnermut Inatsisartut inatsisaat naapertorlugu. Taamaattumik paasissutissanik paarlaasseqatigiissinnaanermi naatsorsuutaavoq paasissutissanik tiguisussap ilitersuisarnerani sulianillu ingerlatsinerani paasissutissat atorfissaqar-

tuunerat. Paasissutissat kommunit ingerlatsiviisa avataaneersunut tunngatillugu, soorlu meeqqat atuarfianniit, paasissutissanik paarlaasseqatigiinneq taamaallaat pisinnaavoq suliffissaaleqisup sullinneqartup akuersineratigut.

§ 7-imut

Suliffissanut, ilitersuisarnernut pikkorissaqqinnernullu qitiusumik ingerlatsiviit tamakkiisumik malinnaaffigisinnaajumallugit, taamalu suliassat inatsisiliornermut naapertuuttumik aaqqissuunneqarsinnaaqullugit, tamanna pisariaqartinneqarpat, Naalakkersuisut suliffissanut, ilitersuisarnernut pikkorissaqqinnernullu qitiusumik ingerlatsivinnut nakkutilliisuupput. Tamaasillunilu aamma periarfissaqassaaq suliffissanut, ilitersuisarnernut pikkorissaqqinnernullu qitiusumik ingerlatsivinni sulisuusut siunnersorneqartarnissaat tapersersorneqarnissallu, aaqqiiniartarnissallu, tamanna pisariaqartutut nalilerneqaraangat.

§ 8-mut

Imm. 1-imut

Nalunaarusiortarnerup Naalakkersuisut nakkutilliinerat ilalersussavaa, nukittorsassallugulu suliat inatsisiliornerullu imminnut naapertuuttuunissaat, tamatumunnga pisariaqartitsisoqaraangat. Nalunaarusiortarnerup annertussusissaa imarisassaalu naammassisassanut isumaqatigiisummi ersissapput, ukiumiillu ukiumut nalilerneqartassallutik kommunit naammassisassanut isumaqatigiisummi anguniakkanik naammassinissinnaassusiat naapertorlugu. IT-REG nalunaarusiortarnermi atorneqassaaq.

Imm. 2-mut

Naalakkersuisut nalunaarutikkut nalunaarusiortarnermut tunngatillugu aalajangersagaliorsinnaapput. Taakkualu tassaasinnaapput qanoq akuttutigisumik qanorlu iluseqartumik nalunaarusiortoqartassanersoq.

§ 9-mut

Imm. 1-imut

Naalakkersuisut kommunalbestyrelsillu akornanni naammassisassanut isumaqatigiissuteqartoqartassaaq. Siunertaavoq erseqqissumik nalunaarsussallugu suliassat suut suliffissanut, ilitersuisarnernut pikkorissaqqinnernullu qitiusumik ingerlatsiviit ingerlatassarineraat, taamalu aalajangerneqarsinnaaqullugu, aningaasaliissutit tunniunneqartut suliffissanut, ilitersuisarnernut pikkorissaqqinnernullu qitiusumik ingerlatsiviit siunertaannut atorneqartarnissaat. Kiisalu aamma siunertaavoq isumannaassallugu suliffissaqartitsiniarluni suliniutit naammattumik pitsaassusilimmik ingerlanneqartarnissaat, suliffissaaleqisut najugaqavissut akornanni suliffissaaleqinerup appartinniarlugu kissaataasunut sanilliullugu.

Naammassisassanut isumaqatigiissummi aammattaaq nalunaarneqartassapput anguniakkat aamma aningaasartuutissanut missingersuusiat nunaqarfinnut inoqarfinnullu allanut tunngasut.

Imm. 2-mut

Naammassisassanut isumaqatigiissummi atugassarititaasut isumaqatigiissutigineqartut eqqortinneqanngippata, Naalakkersuisut periarfissaqarput aningaasaliissutit tunniunneqartartut annikillinissaannut. Assersuutigalugu imaassaaq suliffissanut, ilitersuisarnernut pikkorisaaqqinnernullu qitiusumik ingerlatsiviit aningaasaliiffigineqarsimappata suliffissarsiuussisarfimmi siunnersortinik pingasunik atorfinititsinissanut, ataasiinnarmilli atorfinititsisima-llutik, taava Naalakkersuisut aningaasaliissutinik ikililerisinnaasut, kommunilu taamaasillu atorneqartuinnut naapertuuttunik aningaasaliiffigineqarluni.

Aalajangersagaq pineqaatissiinisamut aalajangersagaanngilaq, tamaallaalli isumannaarissalluni Namminersorlutik Oqartussat suliarineqanngitsunut akiliinnginnissaannut.

§ 10-mut

Imm. 1-imut

Siunnersuutigineqarpoq Inatsisartut inatsisaat 1. januar 2016 atortuulissasoq. Oqaatigineqassaaq kommunalbestyrelsit inatsit 2016-ip ingerlanerani atortuulersissagaat, pisariaqartunillu iliuusissat aqqissuullugit. Ilanngullugulu oqaatigineqassaaq kommunalbestyrelsit naammassisassanut Namminersorlutik Oqartussanut isumaqatigiissuteqassammata 2016-ip naannginnerani.

Imm. 2-mut

Atortuulersitsinermi atorunnaarsinneqassapput § 5, imm. 1, imm. 3 aamma imm. 5 kiisalu § 12, Suliffeqarnermi innersuussisarneq il.il. pillugit Inatsisartut inatsisaanni nr. 5, 8. juni 2014-imeersumi, aalajangersakkat taakkua Piareersarfiit aqqisuussaananut tunngammata, taarsiullugulu Inatsisartut inatsisaat una naapertorlugu qitiusumik ingerlatsivinnut pilersinneqartunut ilaallutik.

Imm. 3-mut

Aalajangersakkap nalunaarpaa nalunaarutit atortuulersinneqartut Suliffeqarnermi innersuussisarneq il.il. pillugit Inatsisartut inatsisaanni nr. 5, 8. juni 2014-imeersumi § 5, imm. 5 naapertorlugu atortuoinnarallassasut, taarserneqarnissami imaluunniit inatsit una naapertorlugu atorunnaarsinneqarnissami imaluunniit inatsit alla naapertorlugu atorunnaarsinneqarnissami tungaanut.